



Ятїул ттугълищал хъхъуттай

Цалчинмур Цувкїуллал пагъламантурал наслулиясса Камил Маммаев дуняллийх ца ларгсса Цувкїуллал пагъламаншиврул касму цїу дуккан дурсса жагъилли учирчагу, тїайлану хъунссар.

7
лаж.



№4
(2170)

3 ФЕВРАЛЬ 2023 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкїссар 1917 ш.
Цїунил итабакълан бивкїссар 1991ш.

Ссавруннай жан дуллу ссавруннал лачин

Февраль зурул 1-нний 1971-ку шинал Совет Союзрал кїийла Виричу, СССР-данул лайкъ хъусса лётчик-испытатель Ахїмад-Хан Султан 50 шинаву дуняллия лавгсса кьинир.

Бусалардавун агьсса лётчик та ппурттуву Ту-16 экипажрал командирну ивкїссар, ва экипажгу цїусса двигательданул хїал ккаклай бивкїссар. Февраль зурул 1-ннийсса ссавнийнсса аьрххи вайннал махъвамахъмур хъуссар.

П. РАМАЗАНОВА

Яла махъ ванал аьралий гьалмахтал чичлантїссар, Ахїмад-Хан Султаннуша самолётрая тїанкї учин хъанай бивкїхъурчагу, экипаж кьабивтун, ванал цукунчїав му даву кьадувантїий диркїшиву, мукунсса иш ванал яхїлил кьамул бай иш кьабивкїшиву.

→ Ахир. 3 лаж



Сталинградуллал талатавриву немец фашистътал ххит буккан бувсса тарих

1943 шинал февраль зурул 2-нний Сталинград шагьрулухсса талатавриву совет аьралуннал ххит бувссар немецнал аьрал. Цїанихсса Сталинградуллал талатаву хъуну гьашиныу 80 шин бартлаглагиссар. Ва талатавриву гьуртту хъусса 125 аьраличунан дуллуссар Совет Союзрал Виричунал ца. Миннава 8 дагъусттанчувнан. Миннавагу 2 лаккучувнан – Ахїмад-Хан Султаннун ва Цїаххуй Маккаевлун. «За оборону Сталинграда» медаль дуллуссар 760 азара инсаннан.

1942 шинал май зуруй Ятїул Аьралуннал цаппара частьру Харьков шагьрулул чїарав душманнал вив ларсун дур. Жула аьрал бух хъуну бур Керчь шагьрулулчагу. Вай гьарзатрал кьиблалул чулухсса жула фронтрал тагьар оьнивун руртун дур. Душман гьужум бувну най ивкїун ур. 1942 шинал июль зурул ахирданий душманнал, Донгу лархъун, Ростов бувгьуну бур. Къубаннал аьршарайх душманнал танкардал колоннаду най диркїун дур. Немецнал канихъхъун ларгун дур Май-

коп шагьрулулчїасса хъунисса навтлил луртанну. Совет халкьуннал Ятїул Аьралуннайнсса вихшала кьукълан диркїун дур. Биляятрал тагьар оьнивун дагьан нанисса чїалан диркїукун, И.В. Сталиннул бувссар бусалдаравун багьсса «Ца ша махъунмай кьаласун» («Ни шагу назад») тїисса хїукму. Кїиттуршва гьантлий най диркїссар чїяусса оьтту экибувтїусса талатавуртту шагьрулул зумахьирагьрай, шагьрулуву тїурча – гьарца кучалул, кьатлул бакїрах.

→ Ахир. 3 лаж

Ислам Махїачев най ур ца уттигу мухїулттул хъирив

– Ина Австралиянавун увкїун ура бияву хъун сайки 3 нюзмардул хъхьичї. Кьаркьсса, кїирисса гьї, термометралий дур 30 градусрал кїиришиву. Цукун бизай вин гьава, аьдат хъанай урав кїиришиврийн?

– Личїисса захїматшиву дакьар. Сбордай на уссияв зунтаву, Эльбрусрай, тикку дяркьудия, шикку дур кїиришиву. Сястрал низамрайнгу аьдат хъура, чантї учара аьркинсса чїумал. На ттинингу хъуссарна Австралиянаву, 5 шинал хъхьичї, амма ва шагьрулийн цалчин увкїссара.

→ Ахир. 6 лаж

Ца ацїуннийр чансса гьантри лях лавгун, куклмур чурххал кїушиврий Абсолют биюлтрал чемпионатрал (UFC) чемпионнал мухїлу ларсма Ислам Махїачев, данди уккан най ур цалла ца (титул) дуруччаврил цїаний рейтинграл цалчинмур ххуттайсса Александр Волкановскишал, февральданул 11-нний, Австралиянал Перт шагьрулий. Вай гьантрай Исламлушал ихтилат бувну бур Новости Спорт РИА-лул корреспондентнал.



Февраль барз байбихъу-сса кьини Дагъусттаннал БакIчи Сергей Меликов хъунаавкъунни Туризмалул корпорациял директор Сергей Сухановлушал.

П. РАМАЗАНОВА

Хъунаабакъаврий ххал бивгъунни туризмалул даву лябуккулий дачин даву мурадрайсса, кIицI лавгсса корпорация республикалушал уртакъну зунсса чаранну. Гъанумур тема дия Каспий хъхъирил зумардая хайр ласаву, цIусса курортру буваву, инвестортал кIункIу буваву. Гъаз бунна Дарбант шагърулий бартбигъин дакIийсса «Отель Палас Дербентрал» масъалагу. Ва проектрайн бунну, 183 номер бусса, термал шинашалсса спа-комплекс, бассейнну бусса, гъармунил дузалсса хъамалхана бунан дакIий бур. Кулпатру ххуйну бигъагулавгун, спортрал тIуркIурдавуху хIала шавансса,

Дарбантлив ххаллилсса хъамалхана бунантIий бур



ххуйсса даражалийсса. «Туризм. РФ. Корпорация» хIасул дурну дур Аьрасатнал вивсса туризмалул экономикалул потенциал

ишла бунансса ххуллурду ляхълан, корпорация му ххуллий субъектирдашл хIала-гъурттуну зийгу дур.

Меликов хъунаавкъунни Росавиациялул каялувчинашл

Январь зурул 31-ний Москвалл Дагъусттаннал БакIчи Сергей Меликов хъунаавкъунни Росавиациялул каялувчи Александр Нерадькошал. Шикку ххал бивгъунни МахIачкъалалал аэропорт цIу буккан баврицIун, дуняллул къатIувсса билятирттайнсса маршрутру гъарза даврицIун, регионал авиоперевозкартансса субсидияртту итадакъаврицIун бавхIусса масъалартту.



Имара САИДОВА

– ХIакъину Дагъусттаннай бигъалаган букIлай бур Аьрасатнал регионалсса циксагу инсантал. Пассажиртал къамул баврил чулуха аэропортрал рекорд дирхъунни. Ларгсса 2022-ку шинал МахIачкъалалал аэропортрай къамул унни 2,5 млн пассажир. Аэропортрал даву ялу-ялу ххуй хъанай дур. Мунияту республикалул каялувчиталгу чялиш бувккун бур аэропортрал реконструкция дан. Тикку реконструкцияртту дурну махъ хIасул хъунтIиссар жула агъалинан ва бувкIсса хъамаллуран къулайшиву дусса шартIру, – увкунни Республикалул БакIинал.

ДакIийн бутанну, паччахI-лугърал проектрал лагрулий федерал бюджетрава 13 миллиард арцул итабакълай бушиву МахIачкъалалал аэропортрал реконструкциялул кIилчинмур бутIул давуртту дуван. Вай арцул шанна шинал мутталий аэропортрай бантIиссар самолету леххайсса ва ликкайсса цIусса ша, самолетиртансса ликканнурду ва чIярусса цаймигу пассажиртуран къулайшиву дусса давуртту. ЦIусса ша буну махъ жула аэропортрай цинярда журалул маркардал самолету къамул дуллансса ихтияр дикIантIиссар. Реконструкциялул давуртту, гъашину дайдирихъуну, къуртал дан ккаккан бун-

ну бур 2025-ку шинал.

Росавиациялул каялувчинал кIицI лавгунни Дагъусттаннал аэропорт цIу буккан баву мурадрай дуллалисса давурттацIун кабаку бан хIадурну ушиву.

Хъунаабакъаврий гъаз бунни аэропортрал аьршарайсса 7-мур подзоналул дазу ришаврил масъалагу. Мукунма ххал бивгъунни МахIачкъалалиссса ва МахIачкъалалиясса авиоперевозкартансса субсидияртту итадакъаврил программа зузи даврил масъалартту. ХIакъинусса кьини МахIачкъалалал аэропортрай 12 маршрут дур субсидиярттайну дуллалисса. Республикалул БакIинал кIицI лавгунни агъалинал ва авиаккомпаниялул тIалавшинна субсидиярттайнусса маршрутру чIяру дансса душиву.

– Субсидиярттал программалул цалчинсса бутIул хIасиллу дурну махъ дурус дантIиссар циксса рейсру гъарза дан бюхълай буссарив. Шиккугу хIисавравун ласунтIиссар агъалинал дянив яла тIалавшинна думи рейсру, – увкунни Александр Нерадькол.

Хъунаабакъаврий мукунма гъаз бунни дуняллул къатIувсса билятирттайнсса рейсру гъарза даврил хIакъиравусса масъаларттугу. Сергей Меликовлул кIицI лавгунни МахIачкъалалал аэропортрай цIусса маршрутру тIитIлансса пикрилий бушиву. Ванал бусаврийн бунну, цалчин цIу дуккан дуллалисса маршрут дур МахIачкъалали Бакуйинсса.

Федерациялул Советрал Элмулул, дуккавил ва культуралул комитетрал председатель Лилия Гумерова ва Дагъусттан Республикалул вакил-сенатор Илияс Оьмаханов гъуртту хъунни «Аьрасатнал тарихрал ва культуралул ирс» тIисса цIанилу хъунтIисса Парламентрал IX форумрайнсса хIадуршиндарал совещаниялий. Ва дачин дурну ия Республикалул БакIчи Сергей Меликов.

Сенатортал Дагъусттаннай



Бадрижамал АБЛИЕВА

Лилия Гумерова цилва ихтилатраву кIицI лавгунни 2021-ку шинал мартрай хъусса Федерациялул Советрал 500-мур заседаниялий Дагъусттан Республикалул БакIинал регионалий ва форум бунансса ситталуцIун бавкъушиву Федерациялул Советрал Председатель ва сенатортал, хъинну авадансса тарих, культура, аьдату, багъу-

бизу бусса Дагъусттаннай парламентарал ирглийсса форум баву агъамшиву дусса ишну хъанакъушиву.

«Жулва гуж – цашиврувур, цашиву тIурча – жува, кувннаха кув къалавхъхъусса, баххана-сса бушиврувур», – увкуна Оьмахановлул.

Гихунмай ххал бивгъуна ва шинал сентябрь зуруй хъунтIисса форумрайн багъайсса масъалартту.

Национал музейраву



Аьрасатнал Федерациялул делегация экскурсиялий бивуна Дагъусттаннал А. Тахо-Годил цIанийсса Национал музейравун.

Хъамаллурал, личIи-личIисса заллавух бувккун, ххал бунна жулла республикалул тарихавусса ярг-яргми иширттацIун, мукунма халкъуннал аьдатирттацIун, багъу-бизулуцIун бавхIусса коллекцияртту. Цил фондравугу 180 азарунни лирчусса экспонатру дусса музейраву хъамаллурал итталу дацIанмур чIяруа.

Микку бусаврийну, Дагъусттаннай электричестволул энергия ишла дуллалаву ялу-ялу гъарза хъанай дур. Сетирдал оборудование дух дурккун дур. ЧIярусса шиннардай ми дакъин дувансса арцу аьркинссаксса къаитадакълай бивкIун бур. Ми ишру сававну, январьданул байбихъулий гъавалул тагъаргу оькки хъуну, чани левшун бия. «Россети» группалул энергетиктурал

Электросетру лядуккан дуван

Январьданул 31-ний Москвалл Дагъусттаннал БакIчи Сергей Меликов хъунаавкъунни «Россети» ПАО-лул гендиректор Андрей Рюминнушал. Миннал ххал бивгъунни республикалул электросетьру лядуккан даврил ва ми дацIаву дакъа зузаврил масъалартту.

бакъин бунну бия зарал хъусса 317 кIану.

МуницIунма «Россети» группалул хIадур дурну дур ДР-лул

энергосетирдал комплекс бакъин баврил программа.

Аьрасатнал Энергетикалул министрствалул цIакъ бивссса

документрай ккаккан бунну бур 2025-ку шинайнин бакъин бунан (реконструкция) 66 подстанция ва электропердачарттал ххаллу. Ми давуртан итадаркъуну дур 25% арцул. ЛирчIми арцулгу хъирив бивзун бур. Мукунма хIадур дуллаи бур МахIачкъала шагъру токрал дузал баврил модер-

низациялул программа. Миккун харж дантIий бур 4,2 млрд къурушру.

«Гъашину жу тамансса арцу итадакъинну регионалул сетирдал комплекс лябуккан баврил давурттан. Инвестициярттал аьмсса лагру шамлийнияр ххилала гъарза хъунтIиссар – 2,9 млрд къурушру», – кунни Андрей Рюминнул.

ХIадур бивссар
ХI. АБДИЛОВЛУЛ

Шяраваллил хозяйствалул лябуккулун

Февральданул 1-ний Дагусттаннал Хикуматрал председателъ Абдулмуслим Абдулмуслимов хьунаавкъунни региондалул Шяраваллил хозяйствалул ва бакла хьиялул министрствалул зуалтрашал.



Батпаврий премьер-министр нахъ бувсунни ларгмур шинал республикалул агропромышленностьрал комплексрал дурсса давуртта ва гьашину бартбигьин аьркинсса масъалартта. Ххал бивгьунни хьуру дугъаврил, ризкьи ябаврил, мелиоратив системартту дакин даврил ва мукунма дукиялул ва лазилкъи даврил (перерабатываю-

щей) промышленностьрал идартту баврил ва цаймигу масъалартту.

Абдулмуслим Абдулмуслимовлул Тимунийну, хьуннасса къулагъас дуллан аьркинну дур дукиялул мюхчаншиврул стратегиялул масъалалул.

«Дагусттан – му бур билатрал шяраваллил хозяйствалул яла хьуними регионнава

ца. Муниату жулва хьхьичи бивхьусса шяраваллил хозяйствалул продукция гьарза даврил масъаларттугу хисавравун лавсун, жува аьркинссару гьуртту хьанан циняв федерал программарттавух.

Гьашину республикалул агропромышленностьрал комплексран кумагран итадакьинтиги бур 2,3 млрд кьуруштуру, ми цинярда цила ххулли харж дуван аьркинссар», – кунни премьернал. Мунал тимунийну, личисса къулагъас дуван аьркинни республикалий ахьнилсса ххяххан давриву лябукку баврил.

Федерал даражалий кумаг буллантиги бур ЛПХ-лух (личные подсобные хозяйства). Миннан итадакьин ккаккан бунну бур халлихшину дурсса кредиту (льготное кредитование).

Личину гьаз бунни наклил ризкьи гьарза баврил, гьаннарал гьаттара ябаврил масъалартту, дукиялул ва шяраваллил хозяйствалул продукция лазилкъи даврил промышленностьрал масъалартту.

Ххал бивгьагьисса масъаларттал хакъираву махъ лавхьунни ДР-лул шяраваллил хозяйствалул министр Мухтарбий Аджековлул.

Батпаврил хасиллу дулла, премьер-министрнал Министерствалул каялувчинан тапшур бунни ххал бивгьусса циняв масъалартту контрольда-нийн ласун.

Ссавруннай жан дуллу ссавруннал лачин

→ Дайдихьу 1 лаж.

Цуксса буслай, чичлай бухьурчагу, цунилва-цунил махлаттал бару Буттал Кланттул цанийсса Хьун дьавилий ванал ккаккан дурсса къучагъшиврул. Ванал биография лахлахьиминнал, аьралий гьалмахтурал чичурдава аьлтта чалай бур дьави байбишиннинма Летно-испытательный институтраву летчик-испытательну зузисса чумалва чалай бивкшиву ва гьунар ххисса, къанкъа-къурчисса жагьил ивкшиву. Васцах къакулсса летчикнан фашистьтурал «Чёрный дьявол» тисса чулий ца дирзун дур, ва гьаваллавун гьаз шайхту, биялсса аваза бутайсса бивкун бур.

Ахмед-Хан Султаннул лайкъ дурну дур 20-нийн лирчусса пачахлул гьарал наградаартту.

Кийла Совет Союзрал Виричу хьусса чумал ванан дахъра 25 шин диркун дур. Буттал Кланттул цанийсса Хьунма дьавилий Ахмед-Хан Султаннул 49 душманнал самолет руртссар. Хатта, ванашал ца полкраву бивкминнал булсасимунийн бунну, 64 самолет руртшиврул хуччарду бур. Вайми Ахмед-Ханнул цанма кумаг буллалисса летчиктурал руртшиврий ккаккан дурну дур, тайналмур захматрангу лайкъсса кьимат бишун ччай.

Мукунма тарихрал архивиртава ва архал зий бивкминнал булсасимунива куну бур Ахмед-Ханнул шамилчингу лайкъ дуршиву Совет Союзрал Виричунал ца, амма, 1944-ку шинал репрессиярттахьхун биривсса татарнал халкьуннал реабилитациялул масъалартту гьаз булла тий, 1951-ку шинал му къадулун ккаккан бунну бур.



Ахмед-Хан Султан

Дахшиштуру дурну дур ванал нину татар миллатраясса душиврул.

Ва шинал ххал бивгьавуртту дуллалисса чумал, исват бунну бур дагьну нанисса самолет-ракетоносец хьинну захматсса шартлирай шьиртшиву Ахмед-Ханнул. Обороналул министрствалул аьралий къуллугъчитурал баян бувссар И. Сталиннул Ахмед-Ханнул къучагъшиврия ва ванан шамилчингу Виричунал ца дулун лайкъшиврия. Амма И. Сталиннул хукму бувссар Ятун Тугълий орденгу, Сталиннул премиягу дулун. Февраль зурул 2-мур кьини Сталинград тархьан бувсса кьинир, Ахмед-Хан Султан Сталинградлул ссавнийгу асланну талай ивкссар. Цанакун Украиннал нацистьтураца мурахас бувсса Мелитополь шагьру таний фашистьтура мурахас булла талай ивкссар. Ссавруннай жан дуллу ссавруннал лачинма личантиссар язимуру ххуттай совет авиациялул тарихравугу, Кира республикалул, Дагусттаннал ва Кьиримнал, тарихравугу.

Мусор бутрайх дачайсса шанма комплекс бунан най бур

Январьданул 31-ний ДР-лул Хикуматрал председателъ Абдулмуслим Абдулмуслимов хьунаавкъунни ДР-лул Табиятрал луртаннал ва экологиялул министрствалул зуалтрашал. Хьунабакъаврий ххал диргьунни 2022-ку шинал экологиялул ва Табият ишла даврил хасиллу ва бувсунни 2023-ку шинал дувансса давуртта.

Премьернал критика дунни министрствалул региондалул экологиялул тагьарданул ялул бацаву хьхьара дурну бушиврул хакъираву.

– Хакъину Экологиялул министрствалул хьхьичи бюхъай бикан циняв идарттал дьанив яла захматми масъалартту. Зул давуртту цинявнан чалай дур, зун аьркинну бикай анаварну бартдигьин агьалинал цулушивруцун ва оьрмулул

мюхчаншивруцун дархусса давуртту.

Хьинну агьамсса масъала – къанкъа коммунал ххиличируду ишла даву. Ми ишла даврин хасъсса инфраструктура сакин даншиврул дузал бувссар «Республикалул экологиялул оператор» ООО тисса компания. 2022-ку шинал къулбасу дурну дур 3 концесси-ялул къутилий, заяварду дулуссар Аьрасатнал Табиятрал министрствалийн, шинци бутрайх

дачайсса комплексу баву мурадрай, ми хьин чулий ккаркун дур. Комплексу буллалиссар Къарабудакантулал, Дарбантулал ва Хасавортулал районнай, – кунни премьернал.

Мунал мукунма бувсунни гьашину букьан буллантишиву Хасавортулал, Буйнакскаллал, Южно-Сухокумскаллал, Каспийскаллал дазурдацхусса шинцил бакурду. Бувсунни шинал объекту ишла баврин ва ми буруччаврин хасну министрствалул дурсса давурттал хакъиравугу.

Яла мива масъаларттал хакъиравусса ихтилатру бунни идарттал каялувчитуралгу.

Хадур бувссар
ХИ. АБДИЛОВЛУЛ

Мурхьру бугьлагъаврил география хьунна дан

Январь зурул махъра-махьмур кьини Дагусттаннал Хикуматрал хьунама Абдулмуслим Абдулмуслимов вице-премьер Нариман Абдулмуталибовлул ивунни республикалул Вацлул хозяйствалул комитетрайн.

П. РАМАЗАНОВА

Ванал бувсунни хакъинусса кьини вацлул фонд 530 азарда гектар душиву, Ухсавнил Къавказнава яла чьавми вацри Дагусттаннай бушиву ва вацлул хозяйствалуву 600-нниха ливчусса инсантал зий бушиву. Бувсунни «Экология» проектрал лагрулий аьркинсса техника ва оборудование машин ларшиву. Шиная шинайн тиссаксагу, дугъай хьуру чан хьанай душиврий чурчав дурну, ванал маслихат бунни ва

ишираху къулагъас дуван, личину маслихат бунни Нугъайнал лесничествалул биьларайсса, мархри, гьанна ххяххан буллалисса питомник цу буккан бунан ва микку терескен, жузгун тисса ххяххияртту ххяххан дуллан, ми аьрши къундалийн дуккан къаритайсса ххяххияртту дуну тий.

Гихунмай Абдулмуслимовлул маслихат бунни мурхьру бугьлагъаврил география гьарза-гьарта дуван ва ми давурттайн жагьилтал кунку буллан.

– Вацраха зузиминнал сипта-

лину ва хларачатрайну мурхьру бугьлагъисса «Хьамакъабитулул багъ», «Ваца ябанну» тисса акциярттай жагьилтал гьуртту хьанаврил миннавун Табияттрахсса ччаву рутлатиссар, Табият ядан, дуруччин аьркиншиврул пикриду цакъ хьанавриссар, дуклаки оьрчру, жагьилтал, бугьарами, гьаннайсса, мюрши-хьуни гьуртту хьанан аьркинссар республика шюллишиврувун дахьлаган дуван, – увкунни ванал.

Вацлул хозяйствалул комитетрал хьунама Вагъаб Абдулхамидовлул бувсунни вацлул участоку пудратрай дулаврия ва арендатортурашлсса даврия, бувсунни вацлул хозяйствалия республикалул ва федерал бюджетиртаван дучаймур махъсса шанна шинал лажиндарай диялну лахъ хьушиву.

Ахирданий премьер-министрнал хьхьичун ливчуминнан дулунни наградаартту.

Сталинградулал талатавриву немец фашистътал ххит буккан бувсса тарих

→ Дайдихьу 1 лаж.

Гьамин, шиккуя ляхъусса «За для нас земли нет!» тисса халкьуннал хьа. Сталинградхусса талатавриву виричушиврийсса ххувшаву ласаврил миллионнайсса инсантурал дакурдиву хасул хьун бувссар лухисса бала-апатраша тархьан хьуншиврийнсса умуд. Ноябрь зурул 23-ний совет фронтиртал группировкаду Калач шагьрулуца салкьи хьуну, вив лавсэсар душманнал 22 дивизия ва 160 часть (амну 300-нийн ливчусса душман). Ва иширал банд лаган бувссар Гитлерду аьрал.

Цалвамур чулухасса бутла Сталинградулал талатавриву бивхьуссар фронтрай талай бивкисса ва къинтулул захмат булла бивкисса дагусттанлултуралгу, 2000-няя ливчусса

дагусттанлултурал жанну дулуссар, миксава ята-тар бакъа бат хьуссар.

Январь зурул 8-ний Совет командованиялул канийн бучансса ультиматум баян бувссар немецнал аьралуннал командующий генерал-полковник Паулюсуйн. Ва канийн учан рязи къашаврилгу хьиннура оьнивун руртссар душманнал аьралуннал тагьар. Сталинград шагьрулий увгьуну ивкисса душманнал 91 азара саллатнава чьавусса къат хьуну бавчуссар дякьил ва азардал.

Ва хьуссар жула аьралуннал ларсэсса яргсса, бюхтлулсса ххувшаву. Ва ххувшаврил Совет аьралуннавун гьавас бувтссар, халкьуннал дакуру тирх учин дурссар. Германнаву турча, шанма гьанглийсса дягьу баян буну бивкиссар.

Хадур бувссар
Андреана АБДУЛЛАЕВАЛ

Цуницлакулгу партиялул каялувчину увчунни

Январь зурул 28-ний Махачкьалалив Национал библиотека-луву хьунни «Справедливая Россия – Патриоты – за Правду» партиялул Дагъусттаннайсса отделениялул каялувчи увчлачИсса конференция.

Имара САИДОВА

Шикку ия республикалул муниципалитетирттайсса 4100 член усса 54 партиялул отделениерттайсса 57 делегат. Конференциялул даву дайдихьлай, партиялул председатель Камил Давдиевлул балжину бувсунни шинал лажиндарай дурсса даврия, хаснува Украиннал аьршарай нанисса хасьсса аьралий операциялуву гьуртту хьанахьисса аьралитуран бувсса кумагирттая.

Партиярттаву килчинмур



Камил Давдиев



Камил Давдиев каялувшиву дуллай ур Республикалий «Справедливая Россия» партиялул фракция сакин дурния шийнай хлакьинусса кьининин.

ххуттай дусса «Справедливая Россия- Патриоты – за Правду» партиялул хлакьинусса кьини хьуннасса жаваблувшиву ларсуннай дур циньявпагу ва партиялувусса члентураху. Хлакьину Дагъусттаннай партиялуву ур 400 депутат, миннава 11 ур Дагъусттаннал Халкьуннал Мажлисраву гьуртту хьанахьисса.

Ихтилатру кьуртал хьуну махь, конференциялий, цуницлакул чурду буллуну, партиялул каялувчину увчунни ДР-лул Халкьуннал Мажлисрал председателна хьиривчу Давдиев Камил Махаммадович. Му бакьассагу, региондалул отделениялул сияхларавун увчунни 23 инсан, цуницлакул сакин бунни контроль-ревизиарттал комиссия. Бувчунни Москвавил хьунтИсса «Справедливая Россия - Патриоты – за Правду» партиялул XII-

мур съездрай гьурттушинна дансса делегатъгал.

Шиккува килч лаган, Камил Давдиев каялувшиву дуллай ур Республикалий «Справедливая Россия» партиялул фракция сакин дурния шийнай хлакьинусса кьининин. Ванйинугу исват хьанай бур Камил Махаммадович даву канилх дурксса, зунсса гьирагу, шавкьгу дусса каялувчи ушиву. Камил Давдиев увчуну ур Хал-

кьуннал Мажлисрал мукьилчинмур, хьолчинмур, ряххилчинмур ва арилчинмур овьчавурттал депутатну. Тамансса шиннардий каялувшиву дуллай уссия ДР-лул Халкьуннал МажлисрачИсса Миллатирттал даянивсса хлалагьурттушиврул, ज्याматийсса ва диндалул цацIушивурттал иширттал комитетрай. 2016-ку шиная шийнай ДР-лул Халкьуннал Мажлисрал Председателна хьиривчуну.



«Фондру цацIун баврийну агьалинан зарал кьахьунтИссар»

Дагъусттан Республикалийсса ОСФР-нул хьунаманал хьиривчу Нуруллагь Сулаймановлул интервьюраву бувсунни, Дагъусттаннал Пенсионный фонд ва Социал страхованиялул фонд цацIун баврийну, кIивагу фондрал хьхьичI бивхьусса мурадду бартлагаврийну цукунчIавсса шавши кьабиянтIишиву, ялунгума, агьалинан дагьайсса выплатарду дулаврил даву бигьа хьуншиву ва ми анаварсса мутталий агьалиначIан диллантIишиву.



Нуруллагь Сулайманов

Социал фонд сакин баврийну куклу хьунтИссар бизнесрал ялув дурсса административ дишала ва ххишала хьунтИссар социал страхованиялул халлихшиннардал шаллу хьанахьисса агьали.

Фондру цаннийца бишаврил агьаммур мурад ялагу выплатарду ва цаймигу халлихшиннарду дулаврил даву бигьа хьун давур. Ца тIалавшиндарайн буну шаллу дан бюхантИссар цинярдагу федерал выплатарду. Ми дулаврил чIунгу дахана кьахьунтИссар. Законодательствалийн буну, ласлай бивкIсса пенсияртту ва выпла-

тарду цIанагу та хьхьичIара дуллай бивкIсса чIумал кунна дуллантИссар. Социал фондрайн багьайсса масьаларттал хIакьираву цIухху-бусу бан бюхьайссар шагьурдай ва районнай зузисса ПФР-лул кьулугьирттахь.

Мува куцуй, чунчIав кьавлагунма, ичIува «личный» кабинетрайхчIин шаллу бан бюхьайссар ПФР-луйн багьайсса личIи-личIисса масьалартту. Гихуннайсса Социал фондрал давриву гьарта-гьарза хьунтИссар электрон журналлий шаллу дан бюхьайсса хIаллихшиннарду.

Ялув кIицI лавгсса пособиартту тIалав баншиврул буллусса гьарца аьрза бакIра-бакIрах ххал бигьинтИссар, цуманан цуксса лагрулул выплатарду дагьлай дурив ккаккан. Му бакьассагу, пособиалул лагру ххал дигьлагьийни, хIисавравун кьаласунтИссар мобилизовать бувсса агьалинансса выплатарду. Мукуна хIисав кьадантИссар ахIвал кIюласса кулпатирттал лавьсса субсидияртту, ниттихьал капитал, налограл вычегтру, мушакьатсса оьрчIал нитти-буттансса выплатарду, тIабиаьтрайнусса баларду, терактру хьусса инсантурансса кумагру.

Социал фондрал чулухасса хIаллихшиннарду

Гьашинусса шинал Дагъусттаннал социал фондрай кьамул буну бур 17 шинавун бияннинсса оьрчIру бусса кулпатирттансса ва лякьилу оьрчI бусса хьаннинсса выплатарду тIалав даврихсса 112 155 аьрза. Выплатардахсса аьрзри кьамул буллай байбивхьуссар паччахIлугьрал хIаллихшиннардал порталданыйхчIин ларгсса шинал декабрь зурул 28-нния шийнай.

Гьарица кьамул бувсса аьрзирал ялув Дагъусттаннал социал фондрал зузалтрал ведомствардайн гьан буллай бур выплатардал хIакьиравусса информацияртту кIул буллалисса запросу. Выплатарду ласунсса аьрзри буллуннал часса дакьар цивпа заллусса хьуслил ва дохотрал ккал. Цавайннал хьуслил хIакьиравусса информация букIлай бур анаварсса мутталий. Информация чIалну бучIаврийну махьун дагьлагьиссар выплатардахсса аьрзри кьамул баврил чIунгу. Ведомствалул зузалтрал баян буллай бур, 10-30 гьантта ккаккан буну бушиву выплатардахсса аьрзри ххал бигьинсса. Аьрзри буллуну махь, миннул хIакьираву кьамул бувсса хIукмулиясса информация бучIантИссар паччахIлугьрал порталданул личный кабинетравун.

Социал фондрай кьамул бул-

лай буссар шанна шин хьуннинсса оьрчIансса пособиартту ласаврихсса аьрзри. Ва пособие тIалав бан бюхьайссар цIусса низамрайн буну. Агана кулпатраву 2023-ку шинайн бияннин бувсса оьрчI бучьурчан, выплатарду ласун бюхьайссар нукIура ласайсса куцуйсса кьануннай буну.

Социал фондрал биялалый дур гьарица зуруй 3 шинавун бияннинсса, 3-8, 8-17 шинавун бияннинсса оьрчIансса ва лякьилу оьрчI бусса хьаннинсса выплатарду дулаву.

Социал фондрал чулухасса выплатарду ласунсса ихтияр дуссар Аьрасатнаву ялапар хьанахьисса Аьрасатнал агьалинахь.


КIулну бикIаншиврул, выплатардал лагру хьар хьанахьиссар кулпатирттал дохотрая ва хьус-кинилия.

Лажин хIадур дурссар
Имара САИДОВА

Маданият

Блокадалул Ленинградран хасну

Санкт-Петербург шагърулийсса Дагъусттаннал художник-стал, цивгу Дагъусттан Республикалул халкъуннал художник Арсен Къардашовлул каялувшиндаралул «Открытая ладонь» цанилулсса творчестволул сакиншиндаравун бухлахисса, цанасса Чумал гьуртту хъанай бур Ленинград блокадалува буккан баврин хас дурсса выставкалий.



Санкт-Петербургуллул Художниктурал союзрал Выставкартту дувай залданува ккаккялун дирхъуну дур 200-нния ливчусса художниктурал каруннил дурмур: живописьрал, скульптуралул, графикалул, суратрал, декоративно-прикладной искусстволул журалул произведениертту.

Цала Арсен Къардашовлул ккаккялун дирхъуну дур «Душшыву» цанилулсса даву.

– Хъун дяввилул шиннар-дий Совет Союзрал цинявпа-гу миллатру цану, ца хъуну талай бивкун тийри гужсса ва охъалсса душманнаяр ххув хъун бювхъусса. Жулва гуж – цашиврувур, ва клану мудар дакний бикан аьркинссар, – тий ур художник цува.

Санкт-Петербургуллул Художниктурал союзрал член Сакинат Исмяиловал выставкалий дирхъуну дур «Скорбь» тисса композиция, Дагъусттан Республикалул лайк хъусса художник, Технологиялул ва дизайнрал СПбГУ-рал сурат диваврил ва живописьрал кафедралул профессор Муса Мусаевлул Турча, «Мы погибли бы, если не погибли...» цанилулсса даву.



Санкт-Петербург шагърулийсса Дагъусттаннал постпредствалул каялувчи Хасан Хасановлул барча бувна ва выставкалий гьуртту хъаныхисса Дагъусттаннал цинявпагу художниктал, ца увкуна вайннан творчестволулсса цу-цусса хъычкуннайшивуртту.

**Хладур бувссар
Бадрижамал АБЛИЕВАЛ**

Лакрал театрдул цунилгу ккаккан бунни 2021-ку шинал ахирданий бивхъусса палангнал комедия, Франсис Вебердул «Контракт» тисса произведениялийнуса спектакль «Нядуку» («Зануда»).

Зулайхат ТАХАКЪАЕВА

Пьеса лакку мазрайн бувцуну бур Руслан Башаевлул.

Бивхъуну бур спектакль Болгарнал режиссер Богдан Петканиннул, уттинингу Шекспирдул кива бюхттулсса произведение «Ромео ва Джульетта» ва «Гамлет» хъунмасса тийлабацлулшал Лакрал театрдул сахналийн буккан бувсса. Байбихулийва Вебердул сценарий чирчуну дур кинофильман ца куну. Амма Лакрал театрдул бишиннингу ва спектакль М. Горькийл цанийсса Ростовуллал академический театрдул ва Ухссавнил Аьсатиннал паччахлулгьрал оьруснал академический театрдул сахнадай бивхъусса Богдан Петканиннул ябтаврийну, текстрал пасихшиврийну ва боевикрал жанр комедиялийн кIура баен барча, театрал постановка киноленталияр ялтту буклай бур.

«Ва киноленталул дур цаппарасса вариантру: кIира палангнал, цагу американал. Амма, ттул пикрилий, царагу сурат тийлабацIусса хъуну чIалай дакъар. Мунияту дакI дарцуну ура на ва текст киноленталияр театрал постановкалул бавкъусса бушиврий», – тий ур Петканин.

Ххуй бивзунни дагъусттаннал тамашачитурал болгарнал тин бусса палангнал къямадия, хъинну хIазсса, бувчингу бивгъусса.

Пьесалул сюжет, ччимур комедиялул кунма, лаласун бивгъусса бур: цанницIун ца лавчIсса патирдул номердаву ликлай ур алши бакъусса фоторепортер

Нядуку – гьар кIанттайва нядукур



Пиньон (Ислам Махаммадов) ва Жан (Адам ХIайдаев), ца агамсса мафиоз-бара ивчIансса мурадрай увкIсса киллер. Ххисшадаран алшибакъу цувагу ур нядуку, бизар шаврил цацIату кулпат ливхъун лавгсса (Жамила Закаръяева). Ганан Турча, чай бур, цанма цала банна тий, нивгъабусан бувну, кулпат занан бан. Му сававрай чIаххуврайсса киллернангу багълай бур Пиньон цаятува цува яулла.

ХIазну ккаккан увну ур спектакльданува цува киллергу, цал бакIран Пиньон сававну чIявусса ккаклай байбивхъусса.

Лакрал театрдул сахналий ттинин дургъусса роллаха къалархъхъусса дур Адам ХIайдаевлул роль. Цайнама бивкуну бувсса шанаша ай ххалаххул шанаша къауван хIарачат буллалийни, хаснува. Га цимилагу личи-личIисса журалий шанийн агъай, амма гава цана, цува ци

мурадрай увкIсарив дакIинийн багъну, изай. Актерनावу къямадиянал гъунар аьлтта чIалай бур. Сайки бачIи спектакльданува га ур чурххал гьарца базу зурзутIи бувну, къущу тий сахналий, хъяхъаврил залгу бур лавсун лагавай.

Бивгъану бакъахъунссия бунивгъалсса роллу дугълай вардишсса Ислам Махаммадовлулгу нядукул роль дугъан. Даки хинсса, аьчухсса инсан, цува цимурца тийлану буллалишиврий даки дарцIусса, амма цичIав дузрайн буклай бакъар. Мунияту ур га ахIмакъну чIалай.

БайкъалитIавай бусларчагу, шайссарив кказитрал чIапIуй актернал ТуркIу ккаккан бан. Оьннасса хъхъу дялахъан дан насыяра зува Лакрал театрдулун, алши бакъусса нядукуй ва мурад дузрайн буккан къабувнува ливчIсса киллернай буччиннин хъяхъаву дан.

Бургъил тIимулул Тилисин бусса Чебурашка

ПатIимат РАМАЗАНОВА

Вана нагу Редукторныйлив-атрдулуну хъунна бивгъусса авазав бувтсса «Чебурашка» киносурат ккаккан. Нюжмар ххисшалагу хъунна арс хъин ивкIун, Пушкиннул карталий билетру лавсун, кинорахун бачу тий. Ларгсса бивгъалагай къинирдай гъан ччай буссияв. Агъ, вил къаттай, билетру биривийххивав, хъиривми бивгъалагай къинирдаймагу бакъая. Бив билетру арвахIкъини сьят ххюннийсса сеансрайн. МаркIачIанми сеансирттайн бакъая. Жу кунма, тIаансса, ххуйсса асардах ххуцI бивкмигу циксагу бакъарив. Чебурашка совет заманнул персонаж бушиврувугу бухъунссия иш, оьрчIшиву дакIинийн рутан бувкIру тисса чIаххулгу хъунна бивкIуна залданува. Кинорал эксперт бакъара, амма найбунува учинна, лагаврия ххари бакъа, пашман къавхъунна.

ХIакъину Чебурашка шал-ХIагу къанкъа-къурчIисса дунияллул аьркинну бур инсантурал дакIру хъюлчай учин



дувансса персонаж хIисаврай. Хъинмунил, ххуймунил хIукъу хIисаврай. Дюхлулул марч дакIурдивун бувхсса асар бутлатисса кино дия бакIрая магъ-ратал дияннин. Чебурашка дунияллийн ляхъуну бур дакIру оьсса инсантал тарбия булла, хъиншиврул гъанна зизлан. Даки чарилсса кунасса багъманчи Геннахъ Чебурашка бур «инсанну бикан захIаатрикий, зу, инсантал, пашмансса агьлу буру, зун багъишла битан къакIулну тий, я зува хIалал битан, я цайми...» Чебурашка паргалну дассан дур-рунни лагмацириннал микIирал дакIру. Киносурат къуртал хъун

ни 1971 шиналсса машгъур-сса мультикравасса балайлийну. Залданувуцири, хъунини, мюрщими, хорданий бавхIуну «Пусть бегут неуклюже...» тий булукъуну бива. Ваца балай ита-бакъин икьрал дурсса кунма. Тяхъусса симаннашал бувккун най бив тамашачитал. Азарийла учирчагу, уттигу тикрал буван, жулва оьрчIан аьркинни гъамин укунсса мяна-мурадирттал мультикру. Ццахханнарал ужа-стикирттая, ттявх-шавхлия, оьрчIал психикалийн шавши биван буварча бакъа, мюнпат бакъар. Чебурашкалувурив бур-гъил тIимулул тилисин бур. Киносуратрал рангру, вацIри, тIабаьт, цимурца яргсса асар-дал видуцIин дуллалисса. Апель-синнал гьаралмур ябатIин къашайсса. Шиккува бусан, съём-картан ряхра тонна апельсин-нал ишла дурну дур. Кинораву-сса ишру хъхъиришсса шагъру-лий хъаныхиссар тий бакъусса, ца къаришурчагу, жунма кIулли хъхъирил зуманишсса шагъру-ду Пятигорск, Кисловодск ва Сочи бушиву. Туристал ила бичинсса даву хъунссия укунсса даражалийсса яргсса киносурат Дагъусттаннай ласурча. Зунттал ва хъхъирил биваят, караматсса тIабаьт, лайкърихха Дагъуст-тангу Аьрасатнал прокатрал лидер хъунсса киносуратран.

Цуссалакрал райондалия Къатри дан кумаг бан тий бур

Уттигъанну Цуссалакрал райондалул бакIчинан кIанайсса Сулайман Рамазановлушчал хьунаавкъунни мобилизациялул хьуминнавух Украиннал аьршарай хасьсса аьралий операциялуву гьуртту хьанай ивкIсса ХIажиабдулла Валиев.

Андрiana АБДУЛЛАЕВА

Ва, шаву дирну, операция бан ватандалийн увкIун ур. Райондалул бакIчинах ванал тавакью бунни цала къатрал чIаравсса кIичIираву чирахь бишьяра куну, мукума лак шусса миналийн бизан баврил ва Аухуллал район цIу дуккан даврил программалул лагрулий цанна



къатри даврил документру шаллу бан кумаг бувара куну. Лак шусса миналийн бизан баврил масъаларттал хIакъираву Дагъусттаннал ХIукуматрал Управленилийн уккайсса райондалул

администрациялул жаваблусса зузала Абдурашид Бутгаевлуингу оьвкуну, ХIажиабдулла Валиевлун къатри дан кумаг бан увкунни. Чирахь бишаврилмур масъала ччясса чIумул мутталай шаллу бан Цуссалакрал шьяраваллил бакIчи Сулайман Оьма-

ровлуин тапшур бунни.

КIицI лаган, нюжмардул хьхьичI ХIажиабдулла коммуннал хIаллихшиннардахсса буржру райондалул хьуниминнал цала арцух лавхъссар.

«Жун саллатIталнугу, хIакинталнугу бикIан багълай бур»

Цуссалакрал райондалиясса жагьилтал цалчинсса гьантрая шихунмай гьуртту хьанай бур Донбасс буруччаву мурадрайсса хасьсса аьралий операциялуву. Миннава-сса ца ур ЦуссачIуртташьял шьяравасса Къушиев Абу-муслим МахIаммадшьяпинал арс.

Ва ивкIун ур армиялий 2015-2016-ку шиннардий. Къуллугъ булла ивкIун ур Екатеринбурграй 28-мур мотострелковый бригадалулу. 2018-ку шинал къуллугъ булла ивкIун ур Аьрасатнал Национал гвардиялу-ву Гудермес шагърулий.

Хасьсса аьралий операция байбишайху, къуллугърал бурж бартбигълай ур Херсоннал ва Запорожуллал областирдай.

– Шикку жун саллатIталнугу,

хIакинталнугу, психологталнугу бикIан багълай бур. Талан бакъассагу, цалчинсса медициналул кумаг бангу, психологический давлениялул лахIан бан къабацIангу кIулну бикIан аьркинну бур, – тий ур Абу-муслим.

Ва хьисагу пашманну акъар Донбасс шагърулул агъали неонацистъятура буруччаву мурадрай хасьсса аьралий операциялуву гьуртту хьанавъарий.



Абу-муслим Къушиев



Ххадиджат МахIаммадова

ХьхьичIунсса ккаккиартту

Цуссалакрал райондалийсса Гьамияшьял 2-мур школалул дуклаки душ МахIаммадова Ххадиджат ххув хьунни республикалий най диркIсса Щалагу Аьрасатнал даражалийсса химиялул олимпиадалий.

Имара САИДОВА

Ва олимпиада хьуссия январь зурул 26-27-нний, 9-11-ми классирттал дуклаки оьрчIал дянив. Олимпиадалу дия теориялул ва практикалул кIулшивуртту аьч дулла-лисса заданияртту дусса кIира тур. Теориялул тур дия химиялул личIиличIисса темардан хас дурсса, заданияртту чирчуну дан аьркинсса.

Практикалулмур турданий дуклаки оьрчIан ккаккан бувну бия лабораториялул экспериментру бан.

Олимпиадалий, лавайсса баллу лавсун, 2-мур кIану бувгъунни Хизрил душ МахIаммадова Ххадиджатлул.

Дуккавриву хьхьичIунсса ккаккиартту дурсса душ барча булла и бур Гьамияшьял школа-лул коллектив.

Ялун уккантIисса чIава «Пифагор»

Ларгсса шинал ноябрь зурул 19-нний МахIачкъалалив хьуссия 5-11-ми классирттал оьрчIал дянивсса «Пифагор» тIисса Республикалул Х-мур математикалул олимпиада. Му олимпиада даврил агъаммур мурадну хьанай бур математикалул чулхунмай гьунар бусса оьрчIру аьлтту баву ва итхьявхсса оьрчIан хасьсса пишарду язи бугъан кумаг баву.

Конкурсерай гьуртту хьанавиминнан ккаккан дурну дия школалийсса математикалул программалувацца 6 задание. Щала Дагъусттанная олимпиадалий гьуртту хьуну ур 1575 дуклаки оьрчI. 1-мур даражалулу дипломран лайкъ хьуну ур 24 оьрчI, 2-мур даражалулу дипломран – 33 оьрчI ва 3-мур даражалулу дипломран – 111 ду-

клаки оьрчI.

Олимпиадалий 3-мур кIану бувгъунни Цуссалакрал райондалийсса Чапаевкаллал 2-мур школалул дуклаки оьрчI Муслим Исмяиловлул. Муслимлул чIавасса оьрмулуву ва хьанай дур цалчинсса ххувшаву. Ххувшаву барчагу дулла, чIа учинну Муслимлул гихунмайгу тIайлабацIуртту.



Муслим Исмяилов

Спорт

Ислам МахIачев най ур ца уттигу мухIулттул хьирив



Ислам МахIачев ва Александр Волкановски

→ Дайдихьу 1 лаж.

– Волкановски вияр 10 сантиметралул лагъсса ур. Тгинин ина ивссарав вияра лагъсса муттаэтурасал?

– Ивссара Арманинавацца жагьилнащал, га ия Волкановскищал архIалсса.

– Ялун нанисса бияврий вил секундантъягалну ца бикIантIиссар?

– Оливейрасал ччалли уккайни бивкIсса секундантъягалли бикIантIисса. Тренертал Хавьер Мендес, МахIаммад БахIандов, уссу Муслим. ХIабиблун кIанай икIантIиссар тренер Асадуллагъ Амирагъаев.

– ХIабиб акъашиву вин

гужну асар хьанай бурив?

– Му усса чIумал хьинну бикIай. Мунал маслихIатру хьинну бучIи лякъай.

– ХIабиблул уттигъанну дурсса ца цIухху-бусулуву кIицI бувна вин ттигу вила карьералий ца ххюйлла-ряххийлла дуруччин багъантIий бушиву вила цIа. Ина ци чара?

– Тгун цалсса тIайлабацIу хьанай бур. ТIайлабацIу буссацца иллансса пикри бур. ХьхьичIуннайшиву къахьанавхисса чIумал къабитанна спорт. Цалсса бюхълай бур иллан, мунияту ачинна хьхьичIунай, ххувшавуртту ласлай.

Артур Бетербиевлул дурурччунни дунияллул чемпионнал цIарду

Дагъусттаннал боксер Артур Бетербиев цал уттигу ххув хьунни профессионал ринграй. Мунал цалла цIарду (титлулу) дурурччунни дунияллул чемпионшиврул шанна ларайсса (WBC, IBF, WBO) версиялий, британиянал боксер Энтони Ярдушчал ччалли увккун.

Ми ччалли бувккун бивкIссар январьданул 29-нний Лондоннай 12 раундрай.

Бетербиев ххув хьунни технический нокаутрайну 8-мур раундрай.



Артур Бетербиев

Ярыгиннул Кубокрай 15 медаль

Иван Ярыгиннул Кубокрай Красноярсклий Дагъусттаннал лачIунбукултрал дурххунни 15 медаль. Миннувату 5 дур мусил, 4 – арцул ва 6 – чарвитул.

Мусил медаллан лайкъ хьунни Заур Угев (57 кило), Муслим Мехтиханов (61 кило), Шамил Мамедов (65 кило), АхIмад Усманов (79 кило) ва МахIаммад Кьурбанов (97 кило).

Арцул медаллу ларсунни АхIмад Идрисовлул (57кило), ХIажимурад Рашидовлул (65 кило), ХIажимурад Аьлихмаевлул (79 кило), Аьлихан Жабрай-

ловлул (97 кило).

Чарвитул медаллу дурххунни Рамиз ХIамзатовлул (57кило), АьппасхIажи МахIаммадовлул (61кило), Ибрагьим Ибрагьимовлул (65 кило), Кьурбан Шираевлул (70 кило), Оьмар Зияуттиновлул (86 кило), Асхаб Сьядуллаевлул (92 кило).

ХIадур бувссар ХI.АБДИЛОВЛУЛ

Цалчинмур ЦувкИуллал пагьламантурал наслули-ясса Камил Маммаев дунял-лийх ца ларгсса ЦувкИуллал пагьламаншиврул касму цу дуккан дурсса жагилли учир-чагу, тИайлану хьунссар. Цай-нува цува пагьламаншиврул ся-натгу магьирну лархьхуну, ва-нал пагьламаншиву сийлун дагьан дунни. Ванал гьунардал ца машгьур хьунни, Дагьус-таннай дакъагу, цайми реги-оннай, хIатта къатIаллил бил-ятирттайгума.

ПатГимат РАМАЗАНОВА

Цусса шинал байрандалул гьантрай Камиллул гьунарда-нул хIайран бунни Москваул-лал агьлугу. Хаснува цусса ши-нал хьхьуну хIат-хIисав дакъа-сса агьлу бувккун бия урчIамур канивусса ятIул ттугьлищал хьхьуттайх лавхьун нанисса дагьусттанчу-пагьламаннай та-маша буван.

«Цусса шин хьунадакъав Ххувшаврил ттугьлищал», – тий чивчуна ванал цала телеграм-каналданий. Аьрасатнаву маш-гьурсса «Хьхьунил барцIру» тIисса мотоклубрал байк-центрданул программалийсса ванал номер бия «Ххувшав-рил ппай» тIисса. Ва «Аьра-сатнал мотоциклистьтал» ида-



Москвавиллв цIусса шинал хьхьуну хIат-хIисав дакъасса агь-лу бувккун бия урчIамур каниву-сса ятIул ттугьлищал хьхьуттайх лавхьун на-нисса дагьусттанчу-пагьламаннай тамаша буван.

ттил ппу, уттигьанну дунял-лия лавгсса цIанихсса зюннав-чи МахIаммадагу (аьпа биву), пагьламан лахьултрашал за-най ивкIсса инсан ия, ванал-гу, цайми хьуниминналгу ца-ма ккавкмуниясса, бавмуниясса хавардал ттувунгу ляличIисса шавкъ рутайва. Гьарца къини тIиссаксагу, на шьраваллил зу-макъирагьрайсса школалийсса пагьламан лахьлан икIайссияв. Тараза сантирай ишла дуван, хьхьуттайх сивсуну шаттир-ду ласлан. Вардиш шайхту, яла ттун тараза дакъанура, каругу

ЯтIул ттугьлищал хьхьуттай



Камил Маммаев Александр Хирурглуцал

Камиллул давурттал сияхI лахьисса дур. Дагьусттаннай ту-ристьтурал къюкьри дусса кIанттурдайгу пагьламан лахь-лай, туристьтурал дакIурдивун яргсса асарду багьансса даву-мур сайки гьар нюз-мардийсса даву дур.

бучIир. Гьаваллавун гьаз хьанай, ялу-ялун машгьур хьанай ур, гьирарай зий ур, цу-цусса трю-кру, увинтру хьхьуттай дуллай, хIайрангу буллай ур. Так ца лар-гсса шинал зувинниха лирчусса проекту бардиргьуну дур.

Ванал дурцири ва дуллалли-ри давурттал сияхI лахьисса дур. Дагьусттаннай туристьтурал къюкьри дусса кIанттурдайгу пагьламан лахьлай, туристьту-рал дакIурдивун яргсса асарду багьансса даву-мур сайки гьар нюзмардийсса даву дур.

тIитин дурну, хьхьуттайх лахь-лан лахьхьин ччан бивкIуна. ЦувкИуллал къучагьсса пагь-ламантурал ца хьиннура бюх-ттул дувансса чувшиву ттувур-а лякъин аьркинссар тий, ттул-ва хьхьичI нава бурж бивхьус-сия. Ва ялагу, на Дагьусттан-нал тамансса шагьурдай, рай-оннай тамашачитурал хьхьичIун уккара. На так цувкИуллал арс хIисаврай акьараха гьунарду ккаккан буллалисса, лакрал мил-латрал ца дуруччин ва гьаз ду-ванна на хьхьуттайн гьаз шай-сса. Тамашалийми ххарину, гур-ну хьатру ришлан бивкIукун, ттулламур дакIгу ххаришиврул дуцIай, – тий ур Камил.

Аьрасатнал рекордирт-тал луттирайн ванал ца ласунсса давричагу зий бур. Лайкъссар. Ца цувалусса пагь-

ралул хьунамал, «Хьхьунил барцIру» клуб хIасул бувманал ва каялувчинал Александр Зал-дастановлул (псевдоним Хи-рург) проектри. Цуппагу магьа хIисаврайсса. Январь зурул ка-никуллай байк-центрданийсса ва яргсса шоу хьинну машгьур-ну дия Москвауллал агьулданул дянив, муния буслайгу, чичлайгу бия социал сетирдай, ютубрай, СМИ-лул.

ЦIанакул, Украиннал аьрща-рай аьралий ишру нанис-сса ппурттуву, совет аьралуннал ххувшавугу дакIийн дуртун, Ук-раинагу нацистьтурацIа марцI буккан бувантIишиврийнсса вих-

шала цIакь даврицIун дахIлай бия хьхьуттайсса ятIул ттугьлил лишангу.

«Байк-центрданийсса магьа оьруснал виртгавран хас бувсса магьари. Чара бакьа оьруснал ххувшаву ласунтIиссар. Ххув-шаврил цIуку буккантIиссар!», – тий ур Александр Хирург.

Ххувшаврил ттугь пперхатIи буван вихшала бувну бур Цув-кИуллал пагьламантурал варис-найн. Камил уттиния тийнайгу ва клубрацIал уртакъну зунтIий ур. Ва ялагу, ларгсса шин Камиллул оьрмулуву хьхьуттай Аь-расатнал ва дуняллул ссаврун-найн гьаз хьусса шин дия учингу



«Дагестан» ГТРК-лул шеф-редактор Назира Аьлиевацал

– Гьай-гьай, пагьламанчи-нал даву тачIаврагу бигьасса къадиркIиссар. Му лахьхьин-на тий къаст лархIумагу хьин-ну дакI къанкъасса, сивсусса икIан аьркинссар. Ттул ни-

ламан шьраваллил пагьламан-турал ца, ягу дурну, гьазгу дуллай ур. Барчаллагьрихха. ТIайлабацIу баннав вин, гьа-валлал виричу, ттул шьравучу Камил Маммаев!



ИТНИ, 6 ФЕВРАЛЬ

05.00 «Доброе утро». (12+). 09.00 Новости. 09.20 «АнтиФейк». (16+). 09.55 «Жить здорово!» (16+). 10.45 «Информационный канал». (16+).

23.45 «Подкаст.Лаб». (16+). 03.00 Новости. 03.05 «Подкаст.Лаб». (16+).

ТТЛАТ, 7 ФЕВРАЛЬ

05.00 «Доброе утро». (12+). 09.00 Новости. 09.20 «АнтиФейк». (16+). 09.55 «Жить здорово!» (16+). 10.45 «Информационный канал». (16+).

03.00 Новости. 03.05 «Подкаст.Лаб». (16+).

АРВАХИ, 8 ФЕВРАЛЬ

05.00 «Доброе утро». (12+). 09.00 Новости. 09.20 «АнтиФейк». (16+). 09.55 «Жить здорово!» (16+). 10.45 «Информационный канал». (16+).

03.05 «Подкаст.Лаб». (16+).

ХАМИС, 9 ФЕВРАЛЬ

05.00 «Доброе утро». (12+). 09.00 Новости. 09.20 «АнтиФейк». (16+). 09.55 «Жить здорово!» (16+). 10.45 «Информационный канал». (16+).

НЮЖМАР, 10 ФЕВРАЛЬ

05.00 «Доброе утро». (12+). 09.00 Новости. 09.20 «АнтиФейк». (16+). 09.55 «Жить здорово!» (16+). 10.45 «Информационный канал». (16+).

СУББОТА, 11 ФЕВРАЛЬ

06.00 «Доброе утро». Суббота. (12+). 09.00 «Умницы и умники». (12+). 09.45 «Слово пастыря». 10.00 Новости. 10.15 «ПроУют». 11.10 «Поехали!» (12+).

АЛХИАТ, 12 ФЕВРАЛЬ

06.00 Новости. 06.10 Д/ф «Вячеслав Тихонов. Разговор по душам». (12+). 07.00 «Играй, гармонь любимая!» (12+).

РОССИЯ 1

ИТНИ, 6 ФЕВРАЛЬ

05.00 «Утро России». 07.35-07.41 Местное время. Вести-Дагестан 08.07-08.10 Местное время. Вести-Дагестан 08.35-08.41 Местное время. Вести-Дагестан

02.30 Елена Яковлева в телесериале «Каменская». [12+]

ТТЛАТ, 7 ФЕВРАЛЬ

05.00 «Утро России». 07.35-07.41 Местное время. Вести-Дагестан 08.07-08.10 Местное время. Вести-Дагестан 08.35-08.41 Местное время. Вести-Дагестан

стень в телесериале «Личное дело». [12+]

АРВАХИ, 8 ФЕВРАЛЬ

05.00 «Утро России». 07.35-07.41 Местное время. Вести-Дагестан 08.07-08.10 Местное время. Вести-Дагестан 08.35-08.41 Местное время. Вести-Дагестан

стень в телесериале «Личное дело». [12+]

ХАМИС, 9 ФЕВРАЛЬ

05.00 «Утро России». 07.35-07.41 Местное время. Вести-Дагестан 08.07-08.10 Местное время. Вести-Дагестан 08.35-08.41 Местное время. Вести-Дагестан

стень в телесериале «Личное дело». [12+]

НЮЖМАР, 10 ФЕВРАЛЬ

05.00 «Утро России». 07.35-07.41 Местное время. Вести-Дагестан 08.07-08.10 Местное время. Вести-Дагестан 08.35-08.41 Местное время. Вести-Дагестан

стень в телесериале «Личное дело». [12+]

СУББОТА, 11 ФЕВРАЛЬ

05.00 «Утро России. Суббота». 08.00 Местное время. Вести-Дагестан 08.20 МЕСТНОЕ ВРЕМЯ. СУББОТА. 08.35 «По секрету всему свету».

Исаев и Андрей Руденский в фильме «Предсказание». [12+]

АЛХИАТ, 12 ФЕВРАЛЬ

06.15 Мария Куликова, Фёдор Лавров и Марк Богатырёв в фильме «Любовь не по правилам». [12+]



ИТНИ, 6 ФЕВРАЛЬ

07.00 Время новостей Дагестана. 08.00 «Королева спорта» 0+ 08.10 Х/ф «Рустам и Сухраб» 12+ 09.50 «Человек и право» 12+ 11.00 Дагестанское кино. Д/ф «Тайна синих гор» 12+

05.30 Х/ф «Кукарча» 12+

ТТЛАТ, 7 ФЕВРАЛЬ

07.00 Время новостей Дагестана 07.20 Передача на табасаранском языке «Мил» 12+

07.20 Передача на лакском языке «Арыши ва агьлу» 12+

АРВАХИ, 8 ФЕВРАЛЬ

07.20 Передача на ларгинском языке «Адыши ва замана» 12+

07.20 Передача на ларгинском языке «Адыши ва замана» 12+

ХАМИС, 9 ФЕВРАЛЬ

07.20 Передача на ларгинском языке «Адыши ва замана» 12+

04.05 Передача на аварском языке «Далагити паламити заманти» 12+

НЮЖМАР, 10 ФЕВРАЛЬ

07.00 Время новостей Дагестана 07.20 Передача на аварском языке «Далагити паламити заманти» 12+

04.50 «Арт-клуб» 0+

СУББОТА, 11 ФЕВРАЛЬ

07.00 Время новостей Дагестана 07.20 Передача на аварском языке «Далагити паламити заманти» 12+

04.45 «Мастер спорта» 12+

АЛХИАТ, 12 ФЕВРАЛЬ

07.00 Время новостей Дагестана 07.20 Передача на лезгинском языке «Вактар ва инсанар» 12+



ИТНИ, 6 ФЕВРАЛЬ

04.50 Т/с «Демонь». (16+). 06.30 «Утро. Самое лучшее». (16+).

00.25 Т/с «Невский». (16+).

ТТЛАТ, 7 ФЕВРАЛЬ

04.55 Т/с «Оперетта капитана Крутова». (16+).

06.30 «Утро. Самое лучшее». (16+).

АРВАХИ, 8 ФЕВРАЛЬ

04.55 Т/с «Оперетта капитана Крутова». (16+).

06.30 «Утро. Самое лучшее». (16+).

ХАМИС, 9 ФЕВРАЛЬ

04.55 Т/с «Оперетта капитана Крутова». (16+).

06.30 «Утро. Самое лучшее». (16+).

НЮЖМАР, 10 ФЕВРАЛЬ

04.55 Т/с «Оперетта капитана Крутова». (16+).

08.00 «Сегодня».

СУББОТА, 11 ФЕВРАЛЬ

04.50 Т/с «Стажеры». (16+). 07.25 «Смотр».

06.35 «Центральное телевидение». (16+).

АЛХИАТ, 12 ФЕВРАЛЬ

07.00 Новости. 08.00 «Сегодня».

«Илчилул» календарь

Ва нюжмардий бувссар

Февраль зурул 2-ний 1969 шинал увссар ДР-лул Халкбуннал Мажлисрал депутат **Марат Илиясов**

Февраль зурул 2-ний 1948 шинал увссар Дагъусттаннал халкбуннал артист **Шамил Керимов**.

Февраль зурул 2-ний 1893 шинал увссар медициналул элмурдал доктор, профессор **Махтаммад Къажлаев**.

Барча бавуртту



Читтурдал шярваллил лайксса арсураврал ххуттайсса жула маччачунал, тухумрал иялчуну хъанахъисса **Маммакъадиал арс Гъапуров** **Маликлул 70** шинал

юбилей барча дуллаи буру.

Чавасса оьрмулия шийнай, хъуннасса гъиву ларсун, мюнпартансса давуртту дуллаи гъан бунни ина вила оьрму. Чъарусса шиннардий ххуллурдал давурттай зий, инава лахъсса даражалул пишкар ушиву куаккан бунни. Маликлул бувсса ххуллурдур тий, ххал хъутари, дакI ххаришиврул дуцай. Ина шярваллил агъулданул, мачча-гъанцириннал, дустурал дянив сийлий ура, вил цанил кьимат лахъсса бур. Жу вин дакIнийхуну ча тий буру цахъсса цулушиву, ххари-хъиншивуртту! Дакинийцири мурадру бартлаганнав, оьрчал ва миннал наслул ххари уллаи, оьрмулия шалихханнин итаннав!

Жугу мударн виха дуаьлийсса ина ххирами

Ва жул насихлатчигу, маслихлатчигур

Жула оьрмулул ххуллий хъунабакъай личи-личисса инсантал. Гъарицагу инсаннал дур цала дунял, тул-табаиат, хасият. Бур миннава цала лагма-ялгтуми рахлат буккан буллалисса, чани ва гъилишиву нанисса, аьчухсса дакру дусса инсантал. Мукунминнава бур «Дараччи» клубрал гъану бизния шихунмай ванил членну хъанахъисса, **Шъаваннул душ Светлана Юсупова**. Вай гъантрай ванил кици ларгунни оьрмулул юбилей. «Дараччи» клубравасса чъавуми хъами ттун кIулссия клуб сакин баннинна. Светланащалил кул хъуссияв цахъи махъ. Аммарив ва ттун оьрмулухун кIулну бивкIсса кунмасса инсан бур.

Светлана бур дакI хъинсса, инсантуран кумаг бан хладурсса, инсаншиву дусса хъамитайпа. Ванил гъарица иширал хъакъираву цила пикри буссар, иш багъсса клантурдай цила махъ бацIан бангу кIулсар. ШихакIуй къалархъхъусса, уздансса хасият дусса буну тий ххирахъунссия ва «Дараччи» клубрал хъунмур **Мариям Чибиевнангу**.

– Хъакъинусса кьинигу ттун хъинну асар хъанай бур **Мариям Чибиевна** чIарав бакъашиву. Жу мударну жула дакIниймур цанни хъаннил бусайссия, маслихлат ккаккайссия. Бия уздансса хъамитайпа. Ттун га тачIав хъамакъабитансар, – тий бур Светлана.

Светланал нину-тпу бур Ва-чичиял шярвава. Вай оьрмулухун МахIакъалалив ялапар хъанай бивкIун бур. Светланагу шагърулий буну, хъунма хъуну бур. Амма, шагърулий хъунма хъусса буну, ванин ххуйну кIулли лакку маз, жула багу-бизу.

МахIакъалалил 14-мур школагу кьуртал буну, Светлана



бувхун бур **Г.В. Плехановлул** цанийсса шярваллил хозяйствалул институтураун. Общепитрал инженер-технологнал пишагу лавхъхуну, Гормолза-водрай лабораториялул хъунмуння байбихъуну, хъунама мастернайн бияннин зий бивкIун бур. Заводрал коллективравугу ва мударну хIурматрай ва бусравну бивкIун бур.

Лайк хъуну бур ведомствалул ва шагърулул администрациялул чулухасса личи-личисса грамоттан. 1999-ку шинал Дагъусттаннай аьралий ишру нанисса чIумал, «Дараччи» клубрал дуллалисса ихIсандалул давурттаву хъалишну гьуртту хъуну тий, ванн дулуну дур медаль. Цила ласнашал АьвдурахIманнушал буну бур нахIу-хIалимсса ужагъ. Тарбия буну бур ххаллилсса хъува оьрчи.

Светлана Шъавановна хIакъинугу **Мариям Илиясовал** цанийсса «Дараччи» ихIсандалул фондрал чъалишса членну хъанахъиссар. Ва жул фондрал кьимат лавайсса, бакъа къабучIисса насихлатчигу, маслихлатчигур.

«Дараччи» фондрал президент Гулшан ХАСАЕВА

Къучагъшиву

МЧС-рал наградалун лайк хъунни


Уттигъанну МахIакъалалив чIару зивурду дусса къатрацIух цIу ларчIсса чIумал нинугу, чIивисса оьрчигу ххассал бувсса **Виталий Ивлелун** Дагъусттаннал МЧС-рал Агъаммур управлени-ялул каялувчитурал буллунни Барчаллагьрал чагъар. Барчаллагь-рал чагъар буллаи, Дагъусттаннал МЧС-рал Агъаммур управлени-ялул хъунаманал хъиривчу **Олег Коликковлул** кици лавгунни дагъусттанчунвал къучагъшиву ва сисаву.

Адриана АБДУЛЛАЕВА

– Жул пахру буссар жула республикалий укунсса, дакI цIуцIисса, захIматсса тагъардануву ливчIминнан кумаг бан хIадурсса, инсантал бушиврия. Виталийл дурсса тул жагъилминнан эьратну хъунтIиссар, – увкунни ванал.

Дакинийн бутан, январь зурул 26-ний, МахIакъалалив, Лаптиева кIичIиравусса чIавусса квартирарду бусса цаппара къатраву газрал лахъсса давление сававну, ацIва квартира-

луву, цал архIал, цIу ларчIуна. Ва иширал бардулт хъусса инсантурал телефондалул камералийн лавсун бур цIу ларчIсса ца къатлул чIарах нанисса **Виталий Ивлел** леххаву тIисса хъамитайпалун кумаг бан шамилчинмур зивулийн лавхъсса куц. Шинал бургулийх ва панжарттайх чIавахъулттийн лавхъун, ванал цал, канийн булчуну, буккан буну бур къатлува чIивитIу, яла, зана хъуну, кумаг буну бур буккан ниттин. Ва ишираву куаккан дурсса къучагъшиврухлу, Дагъусттаннал МЧС-рал



Виталий Ивлел

Агъаммур Управленилул тавакьюрайн буну, Аьрасатнал МЧС-рал бакIчи **Александр Куренковлул** **Виталий Ивлелун** ведомствалул чулуха награда дулун куаккан бунни.

Агъалинал барчаллагьри хъунмур бахшиш

Январь зурул 26-ний МахIакъалалив, Редукторный поселокрай Лаптиевлул кIичIираву, газрал давление гъаз хъуну, цаппара къатраву цIу ларчIшиву баян бунна МЧС-рал пресс-службалул. Гассят интернетрай, социал сетирдай ппив хъуна балаллуша агъали ххассал бувсса инсантурал цIарду: гъинта куна шинал турбалийх лавай лавхъун, шамилчинмур зивулийсса квартиралува чIивисса оьрчигу, оьрчал нинугу ххассал бувсса **Виталий Ивлел**, ва газ пIакъ къаучиншиврул, анаварну ттукI къувкъусса **Гъапуров Зурпукьаллул** цIарду. **Виталий Ивлел** чIарах най ивкIун ур, **Зурпукьал** цIу ларчIсса вайра къатраву яхъанай ур.

ПатIимат РАМАЗАНОВА

Цува дуняллийн увксса, яни 58 шин хъанахъисса, кьини буну бур Зулпукьардул ва гьунаргу. Цанна цала оьрмулухун хъамакъаритансса бахшиш дурну дур. Баширдул арс **Зурпукьал Читтурдал** шярватусса ур. **Зурпукьаллул** буккултрахъ бусансса мурадрай зума бахъайхтува ва ур: «На личисса цичIар къадав, цIу ппив хъун кьаритансса даву дував», – тий. ХъхъичIун урувгсса, пахруххаралул кьанк дакъасса ва инсаннал цала балжину бусансар тий буссияв та кьинисса иширая. Суаллу буллаи, гуж-балагъ гьалгъа тIутIи уван багъунни, гъарца ххуттал хъирив, лажинни, ури-чиюлу мабара тий ия.

– **Зурпукьал, буси, кутIанувагу, виятува буккултрахъ. Ссаха зузисса, ци дуллалисса инсан ура, чув увссара, чув дуклай ивкIиссара?**

– Увссара на Читтурал, дуклай ивкIиссара цал буттал шярраву, яла – Чуртташьял школай. МахIакъалалив Автодорожный техникум кьуртал бувссар, амма ххуллурдал пишкар къавхъура, строительствалул давриву ура, нава залусса чIири-хъунсса предприятие дур пластикрал чIавахъултту, нузру дувайсса.

– **Кулпат, оьрчиру?**
– Ттул кулпат Земфира Ххулусматуссар, кIия арс ур, Гъапуру ва Рустам.

– **Лажинни, буси та кьинисса иширая, ина, гъанавиххи къавхъуну, анаварсса бушилий дуван аьркинсса даву дурну дия тий бур цинья.**



Зурпукьал Гъапуров

– ЦIу ларчIсса хавар шайхту, на чIаххуврал квартираллийн кьутIа тий улувкъуссияв бусса чаралий. Цурдалусса кьари яхъанай дуссар тиву, къатIув дурккун, шарда дакъая, талихIиндаран, архну къаларгун, гивахра дия. Нуз тIитIайхту, пуркIуврал ва цIарал лама най бия кунлия, газрал плита ччучлай дия. Газрал турбалучансса-шланграчIансса ххуллу ласуншиврул хъхъичI дирхъусса мебель дукъан багълай бия, дукъан шаймур дурккун, гъагъари дурну, на газрал турба лавкъуссия, чIавахъултту ябивхъуссия. Ттун гассят бивчIуна газрал давление лахъ хъуну душиву, мугълат бакъа кранну лакьин аьркиншиву, ттукI къуькин аьркиншиву. Яла, анаварну къатIувай увккун, ттукIрал рубильник хъит дурну, ттукI къувкъуссия. Гивахсса цаппара къатри ттукIрал дузал буллалисса трансформаторгу лавхъуссия, газрал цинья краннугу лавкъуссия. Гъаннайсса, шалва къатта пIакъ къаучинсса чаранну ккаккессия.

– **Зурпукьал, ина цIана паракъатну бусларчагу, та ппурттуву газ пIакъ учин бюхъайхха тIисса вас-цахъ бакъаяв?**

– Тайламур бусан, му чIумал инсантуран кумаг буван хъуня тIисса бакъа пикри къабувххуна. Ттуву бия анаварну кранну лакьин хъуня, ттукI къуькин хъуня тIисса пикри. Ттушал архIал лечлай буссия ттула кIилчинма арс Рустам ва дунал арс. Яла махъ бакIравун буххуна, нава ивчIарча, ивкIуну икIанссияв, вайнналми оьрмудугу нигъачIавривурхха бивкIсса тIисса пикри.

– **Му хIалатраву ци буван аьркинсарив, масалдаран, трансформаторгума лещан кIулну лякъаву ва мукунма цаймигу затру мукун цIу ларчIсса чIумал ци дуван аьркинсарив, ттукIлил рубильнику къатIув чув дуссарив... Вин миннул мухIду-хIин ххуйну кIулну диркIун дур.**


– На 1983-1985 шиннардий Къазакъистаннай Державинск тIисса шагърулий аьралий бурж биттур буллаи уссияв. Тикку тамансса затру лавхъуссия, лавхъхумур яла дакиний личIайхха. Тайластар, укунсса баларду ялун бивсса чIумал, чярхний бивсса кумаграчIан цичIар къадияй-ссар. Гъанавиххи къавхъуну, буван кIулну кумаг буван аьркинну бикIай. Таксса аварасса ппурттуву кув тамашалий бия, кув, чулийнмайгу бавцIуну, видеорду ласласисса бия. **Виталий Ивлел** (ва ислам дин къамул дурсса оьрус миллатрал инсан ур) тIурча, мугълат бакъа кумаг буван ххавхуна, паргалну, куклуну лавай лавхъуна, спортравугу итхъавхсса ухъунссия. ИширачIан къаагъну инсаннал хIал кIул къашайссар учайхха, **Виталий куаккан** бунни цува къучагъсса чув ушиву. Буван аьркинмур буну махъ бакъа рахIатну ссикI къалавхъунссия.

– **Барчаллагь, Зулпукьар! Вил чувшиврунгу республикалул хъуниминнал багъавай кьимат бишун-ссар тий, умудрай бур.**

– Кьимат – агъали, ттучIанна гъан хъанай, барчаллагь тIутIавур. Ваняр лахъсса кьиматту бакъа хъунссар.

Фотосуратирттайнусса жула тарих

Ттул Ссухъияци



М. Маллаев



Р. Ибрагъимов



Байбихъулл школалул дуклаки оърчру. 1972 ш.



Аь. АхӀмадов



С. Саэдов



Ка царавусса члун



Аьдат-эбадатрал янналуву

Фотосуратирттайнусса жула тарих




Аб. Тутилаев



Даврия махъ



А. МахIаммадова




А. Маллаев



Дустурал ккуран



А. Шайхов



М. Исмяев



Жагьил замана



Оь. МахIадов



Р. Амирханов



XI. Рамазанов



Буттахъал аьрцарай



Ца чIумул оьрчIру

Ларгеса итникъини Дагъусттаннал Хикуматрал хъунама Абдулмуслим Абдулмуслимов гуртту хъунни Аьрасатнал паччахИлугьрал ишккакку Абдуразаць Мирзабековлун 85 шин шаврин хас дурсса республикалул элмийсса конференциялий. «Мирзабековские чтения» тIисса цIанилу ва конференция хъунни Къизлардал ттукIлил механикалул заводрай. Ваний гуртту хъунни вице-премьертал Муслим Телякавов ва АбдурахИман МахИмудов, кIулушиву дулаврил ва элмулул министр ЯхИия Бучаев, промышленностьрал ва машлул министр Низами Халилов, «Концерн КЭМЗ» АО-лул гендиректор Ибрагьим АхИмадов.

П. РАМАЗАНОВА

Конференциялул дайдихъу дуллалисса махъ лахълай, Абдулмуслим Абдулмуслимовлул кIицI лавгунни махъсса зувирашинал мутталий Мирзабеков Министртурал кабинетрал яла ххуйма каялувчи ивкIшиву, ларайсса мяърипатрал ва интеллектуал заллу ивкIшиву. Був-

ДакIнийн бичинну

Мирзабековлул аьпалун хасну



Абдуразаць Мирзабеков

сунни ва каялувшиву дуллалисса ппурттуву завод «КЭМЗ», производствалул школа бакъагу, лавайсса даражалул пишкартал хIадур бувсса кюругу хъушиву. «Мирзабеков Хикуматрай каялувшиву дуллаи уссия перестройкалул къабибгъасса шиннардий, экономикалуву ва политикалул структурардаву дах-



ханашиннарду хъанахъисса ппурттуву, каялувчинал гъунар, бюхъу-хIарачат, къанкъасса, тIалавшинна дусса хасият ккаккан дурну, ванаща бювхъуссар

республика лашинсса тагъарданийн дагъан къаритан», – увкунни ванал. Бувсунни Дагъусттаннал заводирттай мангъаллу, дикI гъайй машинартту, телевизорду

итабакълай бивкIшиву, Абдуразаць Мирзабековлул республикалул промышленность гъаз дувавриву биялсса бутIа бивхъушиву. Дагъусттаннал халкъунал шаэр, Мирзабековлулу чивчусса авторнал бувсунни вице-премьертал, хъуни къулгъчитал, министртал, аьлимтал ванал оьрмулул ва даврил ххуллун бюхттулсса кьимат бишлай бушиву. Бувсунни Дагъусттаннал халкъунал шаэр Расул ХIамзатовлулгу, Дагъусттаннал агъалинан хъунисса хъинбалартту бувсса ва буллалисса премьер-реформатор Мирзабековлулу увкуну бивкIшиву.

Абдуразаць Мирзабековлул уссил, «Электросигнал» АО-лул хъунама Далгат Мирзабековлул, республикалул хъуниминнахъ барчаллагъ увкунни цала уссил цIа уттара дуллалисса мероприятияе дуваврихлу.

Ттул буттал, Хъуриятусса АьвдуллатИпов МахИаммадул, 1935-ку шинал Грозный буьккуну бивкIсар СССР-нул НКВД-лул политзултрал школа. Лейтенантнал чиндалу-ву зана хъуну, зий ивкIсар Шурагъ Буйнакскаллал райкомпартиялул инструкторну, финотделданул хъунаману. Яла 1937-ку шинал ивтссар Буйнакскаллал райкомрал секретарьну. 1939-ку шинал тIурча, цала тавакьюрайн бувну, ва лавгссар Лакрал райкомрал секретарьну. Зийгу ивкIсар ва даврий 1954-ку шинайнинн. Ва ивкIсар райкомрал партиялул бюрорал члену.

Муниннин ттул ппу чIивинияцIа шагъурдай ялапар хъанай ивкIсар. Лаккуйну, хъинну чанну акъа, къаучIайсса ивкIсар. Ца базилух, шяравун цалла ниттичIан отпускалий увкIун унува, ванан ххал хъуссар хIатталлий, гъавгъун, экъибивчусса кIалабарзру. МахИаммадул му иш хъинну оьлу бивзун, оьвкуну шарнил буттайн Хиусайннууйн, ганахъ увкуссар: «Та иш хъинну ххуй бакъасса ишри жула шяраваллин, бавтIун вила махъ бияймигу, инара бакIчишивугу дурну, та хIатталлий зуманицIсса барничIа ккурчIа-къатта бувну, кIай кIалабарзругу лагмава бишияра», – куну.

Гъунттиймур къини, Хиусайннул бавтIун шарнил араммталгу, буллан бивкIсар ккурчIа-къатта. МахИаммад цува хIала къауххарчагу, цукун ци бантИссарив буслай ивкIсар. Ва иш ххал хъусса цаннал (укунмигу тачIав чан къашайхха!) Гъумукун баян бувссар, Хъурият цIусса мизит буллай бур, танил бакIчинугу шагъурлия увкIсса АьвдуллатИпов МахИаммад ур куну. Тай шиннардий МахИаммад чIавуминнан къакулуну ивкIсар. БувкIун Гъумучату милица, шивитун линейкалийгу, увцуну лавгссар. Му чIумал нинугу диркIссар бутташал Шурагъагу дуркIун. Ниттил буслай, ппу, ссихIгу къадурккун, лавгуна тIива уцин бувкIминнашал, цихъвагу увку-

Ттула буттал бакIрачIан бувкIсса ца-кIива иширая



Лакрал райондалул къуллугъчитал. АьвдуллатИпов цалчинмур ххуттай кияха кIилчинма. 1948 ш.

на тIива: «На чIал къавхъуну учIанна, ина гъавккури бувну хIадур ба, хъамалдуранссагу», – куну. Яла, ца-кIира ссятрава, мьяйжаннугу хъамалдурашал махъунай увкIуну ур. Гъумук ва цу уссарив кIул хъувкун, тагъардахана хъуну дур. Буттал тиккугу увкуну бивкIун бур: «Чув чивчуну буссар цала нитти-буттах бившусса кIалабарзру гъагъияра тIий, ми гъавгъминнан бан аьркинссар танмихI, кIалабарзру жула тарихри», – куну.

Гъумучату бутташал бивкIминниттин къакулула, амма тай хъинну хIурматрай зана-къулу хъанай бия тIива.

Ца цамургу иш. Дяъви байбивхъусса чIумал, Дагъусттаннайгу, мукунма Лаккуйгу, бивкIссар къачансса къачагътал, дяъвиллийнгу къалавгун, зунттаву, ххаллаву къюлтI хъу-

ну, райондалул хъуниминнал хъирив «авлий буьклай», партиялул даврий зуминнал сияхIру дуллалисса. Мукунсса ца къюкъа хIасул хъуну диркIсар Маичайиннал махIалалийгу – личИличИисса шяраваллавасса.

Нину буслай дикIайва, сайки гъарца бигъалагай къини, ттупангу лавсун, ппу авлий уккайва тIий. Яла махъ кIул хъуну бур МахИаммад, авлий уккайвагу багъана дурну, ваца разведкалий куну, лагма уккан лагайсса ивкIшиву. Ца мукунсса къини Хъурукратусса шиннив ххал хъуну ур зунттуй ярагъунишчалсса адамина, мунал леххаву руртун, ччарду дуллалисса хъами-арамтал «шпион» угъан бивчуну бур, хъулли-ччаллугу кIунттил бувгъуну. Гай ххал хъусса ттул ппу, ца къунттучIа, чIалачИисса кIанай, сукку къав-

хъуну авцуну ур. Вава чIумал Хъурукрату Гъумукунгу оьвкуну бур, ВацIиллул махъ «шпион» ур тIий. Му ппурттуву НКВД-лул начальникну зий ивкIун ур Гъухъалиятусса Кауров ХIанапи. Оьвкуманахъ мунал куну бур, цув къавкIун кIаначIан гъан машару куну. Ххал барча ХIанапина кIулну бивкIун бур кIа «шпион» цу уссарив. Яла, хъунма хIал къалавгун, бутташал ХIанапигу, цайийму шаппай бувкIуна тIива ниттил.

Бусанна ца иширая утти-тIайла буьклакисса чIумал Ахъушиял райондалий. Дяъвилул чIумалгу, ганиннингу, ганияр махъгу, районнал хъуни-ми яттишал, дучрайгу бурттий, къутаннайн бияннин лагайсса бивкIссар. Мукун, 1942-ку шинал, ттул ппу ятту тIайла буьккан

най унува, Уручулал шяраваллия арх бакъасса кIанай, ванан ххал хъуну ивкIун ур ярагъунилгу алгусса 3 адамина. Гай ванал чIарах буьккун лавгун бур. Га кIанайсса яттил ттурзан ХъурукIуллал колхозрал диркIссар. ХъурукIратусса удаман Къандаалаев СсапардучIан бувкIун, гай шамагу цIухлай бивкIун бур, та цIана бурттий лавгсса адамина цуя тIий. Ссапардугу жун кумагран увкIсса шяравачури куну бур.

Буттангу шак багъну, гай ца бивкIан бюхъайссарив, анаварну хъхъичIунай лавгун ур. Гайннахъхъунгу иривну, цува райкомрал секретарь ушивугу ашкара хъуссания, так ца Аллагънан кIулли ци хъун най бивкIссарив. Гай бивкIсар, дяъвиллийгу лавивкIун, хъямалашиннарду дуллаи заназисса мьяйжаннугусса къачагътал.

Ттула буттан ккаккун бивкIссса гъарзат къачичланна. Ванайн шамилла покушение дурну диркIссар, шамиллагу шаву дирну, амма оьрмулуцIа къавхъуну ливчIссар. Тай шиннардий партиялул даврий зуминнал кулпатирттангу хъунисса нигъачIаву диркIссар. Дяъви къуртал хъуну махъгу къачагътал къюлтIну цашава шайсса заралул биян буллай бивкIссар.

Ппу 1949-ку шинал 9 зурийсса партшколаллий МахIачкъалалив лавгсса чIумал, жул къатлувун цIу руртун диркIссар. Хъуриятусса жул къатрал 1-мур зивулий къатIувппай чIавахъултту бакъассия, циняв хIаятравунмай буссар. Так жул буттал буттал АьвдуллатИпилул дуссукъатта бия къатIувппай ца чIавахъулу бусса, цачIана даврил хIакъираву увкIсса инсан гиччава шаллу авансса. Га чIавахъулттийх лухIи навтливху дурксса ащи, цIугу шуну, дуртун диркIун дур. Ттун дахъра дакIний дур, шалла шарнил халкъ буьккун, цIу лешан дурсса чIун. Му чIумал ттун оьрмулул 4 шин дия. Жул къаттагу зумащарнищI буссар. Ттигу ливчIун бур та иширал барашин дуллалисса лухIисса тталлу.

АьвдуллатИпов,
АьвдуллатИпов,
ш.Хъур

Муркбилинахъал Юсуп (халкъуннаву ванайн Юсуп-къади чайсса бивкIун бур) увссар 1863 шинал Гъази-Гъумук. Дагъусттаннал личИ-личИсса шархъаву мюталинну дуклай, мунал ларсун дур чIумун лархъхъусса ххуйсса кIулишуву, ларсун дур «къади» тIисса цIагу. 1908 шинал, Ттуплисливсса Закавказуллал РувхIанийсса правлениялул алимтура-хъхъун ххаллилну дуллуну дур аьраб, парс, турк мазурдил, риторикалул, логикалул, арифметикалул, шариаьтрал къануннал, вяъза бусаврил, мизит бачин баврил, дарс-рудишаврил ва цаймигу предметирттал экзаменну. Ми дулаврийну ларсунгу дур та чIумал Аьрасатнаву ца яла лахъмурну хъанахъисса «эфенди» кусса цIа.

1914 шинал Юсуп-къади зий ивкIун ур КIапкIайливсса (цIанакулсса Владикавказ) мизитралгу, мизитрачIисса мадрасалулеу хъунаману ва муабллимну. Мукуссса къуллугърай та чIумал цу-цу-унугу итайсса къаивкIиссар.

Махъ бакъа, Муркбилинахъал Юсуп-къади хIисав хъанай ур, цала чIумун лавхъхъуну, хъинну чантI увкусса, элму дуркуссса, хъхъичIунайсса инсанну. Мунал чичайсса бивкIун бур балайрду-шегъирдугу, миннувацца цаппара бившуну буссар поэзиялул антологиярттай.

Юсуп-къадинал душ Рашидатлул КIаазарулку шиннардил дайдихулий чирчусса вай дакIнийн бичавурттавагу жула хъхъичI ацIлай ур итххъхъсса, овъхъусса ва илданул дянив хъинну сийлий ивкIисса инсан, дуняллия хавар бусса, дуркуссса зунттал адамина.

Ттун буттал лажин къаккаркссар. Амма, ттуна хъинну кIулсса куна, чIявуну хъхъичI ацIлан икIай. Ванал нугъай чай хIацIлай ивкIисса кIичIу канил бувгъукун, буттал мурччив, кару хъхъичI дацIлай, ттуца ганивату чай хIацIан къашай. Я цамунахъхъун булун дакI къади-яй.

Жула цIа дуркусса фотокорреспондент Камил Чутуевлул буттал ниттил ЧчютIухъал Гулизардул ттун ттула ппу чIалачIи увна: ганаха лавхъхъусса, ганаяр ххуйсса арампал дуняллий хъинну чансса буссия куну. Танил ттун ттула буттах личИсса ччаву хъун дуруна.

Ва иш хъуссия укун. На Гъумук хIакинну зузисса чIумал, 1941-1942 шинал, ттуйн чIявуну овъчайва ЧчютIухъал ГулизардучIан: кIа дикIайва, сситтукъатлуву чартту хъуну, приступпу хъанай. На цачIанма бувкIтари, ттухъ буслан дикIайва буттаясса хаварду. Цуксса ларайсса тIул-тIабиаьтрал, бакIрал ххуйсса, чурххал овъхъусса адамина ивкIиссарив, цукун пасихIсса мазрай, ххуйсса, тIааьнсса чIуний инсантуращал ихтилат байсса бивкIиссарив.

1944 шинал Агъдан тIисса Азирбижаннал шагърулий ттул ласнал Данияллул увцуну увкIуна ца хъунасса аьлимчу. Вана вари Юсуп-къадинал душ куну, на ккаккан бувнав танан. Ца дакIний къалирчIунни. Танал ттухъ бувсуна буттаяту тамансса хаварду. Хъунасса промышленникнал Тагъиевлул Бакуйн бавтIуна тIива Къапкъазнаву бур кусса цIа дуркусса аьлимтал. Тикку буттал бувкIуна тIива хъинну пасихIну, марцIисса азирбижан мазрай къюмайтIутIуя чивчусса шеъри. Юсуп-къадинал тикку бувгъуна тIива цалчинсса кIану. Подаркалунгу дуллуну тIива медаль ва мусил яха. Му яха ниттил хъунмур душ шар булайни ганин дуллуну.

Ттул ппу хъинну цала кулпат, обрчIру, гъанми ххирасса, нахIусса адамина ухъунссия. Ппу ивкIуну 40-50 шин хъуну махъгу ттул ниттил, ххарину, ххирану дакъасса, буттал цIа зумух къаласайва.

– Дадай! Ина буттах эшкъи хъуну духъунссияв, ганан инаранияр га вина ччисса ухъунссия, – тIий, жу цихъва хъярч бувкун, кIирагу каних лажингу кIучI дурну, ваца дан къабагъайсса даву дулла би-

Юбилейран хасну

РАШИДАТ ХIАЖИЕВА

Ттул ппу Муркбилинахъал Юсуп-къади

ДакIнийн бичавурттава



Юсуп-къади

ривни кунма, учайва: «Духъунссия...», – куну.

Цаппара хIаллава буттал цащалава архIал КIапкIайлив кулпатгу бувцуну бур.

Ца къини КIапкIайлив, нину ва ппу гостиницалул чурттурдайх лавхъун най бунува, ниттин ххал хъуну бур ца адамина ва хъамитайпа пашала чурттурдайх лавхъун най.

– Юсуп! Ургу тайннал ххуйшиву, ппу ва душ бухъунссар, – куну бур ниттил, тай чIирайсса дагъанттуву чIалачIисса цивппа бушиву къабувчIуну. Бутталгу увкуну бур:

– Ттун тай ца буссарив къакIулли, амма на гъархъуну та душничIа утту-ишинтIиссара, – куну.

– Къаивхъуну икIайссаривгъар, бухъунссия таксса ххуйсса душ вичIа утту-бихълай, – куну бур ниттил.

Бусурманнал хъами, хаснува аьлимчунал кулпат, къатIув, ттучаннайн, базалулун буккаву ххуйшивуну ккалли къадайсса диркIун дур. Ттул ниттин хъинну ччай бивкIун бур ттучанну ккаккан гъан. Ца къини, ппугу шава акъасса чIумал, буттал ссурахъил шарссанищал ларгун дур ттучанну ххал бан. Шин ккарккун диркIиссарив, бувсун бур буттахъ.

Шаппай бувкIун махъ, чIугу лахъ бувну, амма нахIуну увкуна тIива: «Ина ттухъ циван къаучав, винма ттучанну ккаккан гъан ччай бур куну. На ина дуцивиявхъа», – куну.

Азайни душниятту

Ттул буттан Юсуплун, Азайнив (цIанасса Таркилий) та чIумал цIа дуркусса Аьликъади СалтинскийчIа дуклакисса чIумал, хъунабавкъуну бур хъинну ккаккангу ххуйсса, чан-къансса аьрабрайгу дуркуссса, пасихIну балайгу чичайсса Абай тIисса къумукъ душ. Вай, цаннан ца хъинну ччангу хъуну, хIалагу бувххун бивкIун бур. Цаннал цанначIан эшкъи-ччаврил чагъардугу чичайсса бивкIун бур.

Юсуплул чагъарданува:

Абай, ина вих хъу, захIматну ура,
Алвагъ дикIул дакIеу къуману ура,
Булбул, вил ххуйшишврий хIайранну ура,
СсехIрул калам буслай, хIасрат мадара.

Утти хъинну бикIу,
ххуй хъункIултIултIий,
Ттуллул багъирдавсса оьрму буливуй,

160
ШИН

Нагу хIалал ити, итаргул яруй,
Чун нава гъарчангу,
рухI вин къариртссар.

Абайл чагъарданува:

Агъ, хъункIултIултIул дакI
хъяхъа увкунни,
ЛухIитIултIул яру мукъал ливцIунни,
КIяла ариул хъазам ччаврил бувцIунни,
Мюталин, ва хIаллай язугъ мабара.

Элмулул дуттирдай хатI нава хъурдай,
Ина канил бугъан къаламну хъурдай,
Я вищал бучIансса каши ттухъ хъурдай,
Таллагъ, личИ шайхту, хъяхъа чинссара.

Буттал ва Абайл ччаврил ахир хайрданийн къадурккун дур. Юсуплун ва душ дакIнийхтуну ххиранугу бушиву, буцингу ччай бушиву, шил баян бувссарив, баян бувну бур Гъумукун. Ва хавар баяйхту, Юсуплул буттал Загъидинал Азайнив гъан бувну бур цала арс Аьлилгу, ца цамагу, Юсуп ушин шавай. Дуклакавугу къаритан увну, къумукъ душ буцин къаитан, увцуну бувкIун бур. Ппу хъинну къуману, ци банссарив къакIулну ивкIун ур, га душ дакIнийн багълай. Укун чичлай ур:

Ссавний лелуххухъун, ласайссания,
Чагъар гъан бавияв ттул лачиндалиин
КIюрххил бизай мурчан маз кIулссания,
Ссалам тIайла буван тIултIул яруннайн.

Макъгу марутIлатIра,
михақрал тIултIий,
ЗанначIа цIимирду чIявусса буссар.
На дакIнийн агъукун, леххаву уча,
Ляхъан був Аллагънахъ ссавур чIа куну.

Ца хъамаличунал буттахъ бувсун бур, Абай, цахва ялугълай, хIасратрай бушиву.

Ва хавар бавукун, буттал пикри бувну бур, шихъкIуй ссехIгу къадурккун, гъан цанма ччисса душнил хъирив Азайнив. Лавгун ур. Бугленнал мизитраву хъунабавкъуну бур Азайнив пашала дуклакисса мюталинтал. Гайннал щялмахъ бувсун бур, Абай цаманан шар булун увкуну буссар куну.

Тти пайда бакъассарча куну, ппу кIура авну ур махъунай Гъумукун. Нину дурцуну махъ буттан бавну бур Абай щинкIуй шар къавхъунма бушиву. Му хавар бувсун бур ниттихъгу.

Муния махъ, цукун хIала хъуссарив, ттул нинугу, Абайгу хIала хъуну, цаннил цанничIан чагъарду чичайсса, ссайгъатру гъан байсса бивкIун бур.

Ниттил чIявуну барчаллагърай буслан дикIайва, ттул уссу хIамзат увсса чIумал, га хъуна ан Азайни душнил гъан бувсса ххуйсса чагъарданул ва хъунмасса ссайгъатрал хаваргу. Ниттил цилагу гъан дайсса диркIун дур ганин, гулаватилул бакIбахIулияту тIайла хъуну, ххуй-ххуйсса затру.

Ниттил ганийн «азайни душ» бакъа къаучайва. Хъинну ххуйну, ххарину, пахрулий гъалгъа тIун дикIайва ганияту. Ахирданийгу ххалвагу къавхъунма бивкIуну лавгун бур буттал цалчинсса ччаву – Абай.

Хъиривгу буссар

Январьданул 30-кусса кьини... КИядизулул гьантри, шинал вайми кьинирдаяр ляличИну ссалчIав личИ дакъасса кьини. Амма ва кьини кьума-цIансса кьинину дурхссар лакралгу, Дагъусттанналгу тарихравун. Ва кьини, 1975-ку шинал, цила оьрмудулгу, творчествалугу аргъираву бунува, аскисса ккуллалул жуятува батIул бувссар жула бюхттулсса балайчи Мариян.

Бадрижамал АБЛИЕВА

Ва кьини жу хьунабавкьору Марияннул ссишал, Каспийск шагърулий ялапар хьанахьисса Субарижатлушал, дакIнийн бургарду Мариян. Бувну бур Мариян августрал 28-нний 1936 шинал Лакрал райондалий Шахъуйннал шяраву Маммада ва ПатIима Маммаевхьал дянивсса шамилчинсса оьрчIну. Марияннуяр хьхьичIгу кIива оьрчI (Муслимаат ва Жалалуттин), махьгу кIива оьрчI (Субарижат ва Маммада) бивкIун бур. Кулпатрал заллу Маммада Хьун дяввилиин лавгун 3 зурувун дунияллийн увксса, бутгал лажиннагу къаккарксса ххюйлчинсса оьрчIан дирзун дур буттал ца. Му чIумал ппу аьрай ивкIусса хавар бувкIун бивкIун бур. Хьинну мискинну, захIмат-жапану ялапар хьанай бивкIун бур нину ва кувннил хьирив кувсса ххювагу ятин. Ниттин колхозраву зун багълай, чIивисса Маммадахь бурглай бивкIун бур Мариян. Цила чIунархIал оьрчIаяр шанна шинал махьун багъсса душ дуклан итабакьи тIий ПатIималучIан увкIун ур колхозрал председатель. Рязи къахьанайгу диркIун, ахиргу увкуну бур ванахь: «Шаппагу мудар цацIусса кIивагу душ гихунмайгу архIал битарча, итабакьинна», – куну. Укун, Мариян ва Субарижат дуклан бивкIун бур Гьумук детдомрай. Цанагу, вайксса шинну ларгун махьгу, Субарижат бусраврай кIичI лаглай бур та чIумал хIкуматрал ятинсса оьрчIан хIасул дурну диркIусса шартIру, ятинтурахьсса къулагъас, аякъа.

Гьумук детдомрай Субарижатлул Марияннушал архIал дурну дур кIира шин. Гихуннай, ятинтал ялу-ялун чIяву хьанахьаву ва цинявннан детдомрай кIану биал къахьанахьаву сававну, ца кулпатрава ца оьрчI бакъа битлан къабивкIун бур. Мукун, музыкалувугу, спортивугу, дукавривугу, гьарцагу чулуха итхьавхьсса Мариян гихунмайгу дуклай къабивтун, Субарижат лавгун бур детдомрая.

Гьумук 7 классгу къуртал бувну, Мариян бувххун бур Шурагъсса хьаннил педучилищалувун. КIива курс бувккуну, кIива ялагу буккин ливчIесса чIумал Мариян гьинттул Шахъувату чIявусса цайми душварашал гьанчунал хьатIийн ГьунчIукьатIув лавгун бур. Шагърурда шяравун хьатIийн

ДакIнийн бичавуртту

КIи-шан гьаргъсса кIидядизулул кьини



Мариян (кияха кIилчинмур) цила хьатIул кьини. 1958 ш.



Марияннул нину ПатIима



Марияннул душнил душ Мариян

бувкIусса гьунчIукьатIрал жьгилтуравах ивкIун ур Ярагъи-гу. Педучилищагу къуртал бувну, Ленинградрай консерваториялувун буххан гьан дакIнийсса душ, кулпатрал хьуну, шихва ливчIун бур.

Мариян бучлачисса кьини, чIявусса цайминнан



Ссу Субарижат ласнашал Закирдущал

кунна, хьинну асар хьуну дур ва ххуйну дакIнийн лирчIун дур Субарижатлун. Халкъуннан цанма ххирасса Мариян ккаккан цуппа дарсеру дихьлай зий бивкIусса Культпросветучилищалул жанахIраву бивхьуну бивкIун бур. Ванил хьуннасса сурат дурну дур, мюршиссагу 200 сурат дурну диркIун дур, бувччуну бур багъайсса кушцуй.

ЧIявусса халкъ бавтIун бур Мариян махьва-махьсса ххуллийн тIайла буккан. УчлищалулчIату бахьтга бавчуну, Тарки зунттул ухнилущIун хIатталличIан бияннин кIичIиртту лухIи лаган бувсса инсантал най бивкIун бур. ХIатталличIан биявайсса кIанай ванишал уртакъну зий бивкIусса Духовой оркестрданул рурцусса макъандалул, ванин-



Мариян

нин абкъатIисса ливчIун бивкI-хьурчагума, циняв аьтIи бувну бур. Хьуннасса бусравсса къуллугъчи уччайсса чIумал куннасса тагъар диркIун дур.

БивкIусса чIумал Марияннун диркIуссар дурагу 38 шин.

Мариян винма яла-яла ци чIумал дакIнийн ливчIри тIисса ттул суалданухун Субарижат тIий бур:

– Га дия Мариян ниттил бувну 38 шин кIичI лагалисса 9-мур майрал кьини, ванил цуппа бувсса кьини махьра-махь кIичI лагалисса 1974-ку шин. Мариян цуппа августрай бувсса бунугу, ванил му кьинину язи дургуна цинна ххирасса Ххувшаврил кьини. Шикку ванил щаллу бувна ганиннин ттунма тачIав къабавсса балай «Авчитал». Вай мукъурттил, балай щаллу бувсса кушцул ттул дакI кьума лаган дуруна, ттуйва бияла бакъа макъ дарчунна. Та кьинигу хьинну дакIнийн дур. Яла, августрал 4-нний, Каспийскалий концертрай щаллу бувна ванил ва балай. Зал бия ккуччу тIий бувчIуну. Бияхха ва кьини сахIналийсса Мариян ляличIинува ххуйну чIалай, цила дурурххусса яннагу ва кьини ваний ляличIинура даркъуну дия...

Марияннул сахIналийн ляххайсса яннарду цила дуруххайсса диркIун дур. Буччайни вайгу пишалла гьаттаву дирхьуну дур.

Циттил ца дирзсса Мариян буслай бур:

– Январьданул 30-кусса кьини жу мудар лагару хIатгаллийн, мунилгьаттайн. Ва кьини бачIару кIюлаччатI, бувару бакъухъ. Цимилгу хIайп ттулла ххалилсса, гьунар бусса ниттил нину нава дунияллийн букканнин, ттунна кIул хьуннин къадиртсса. Хьинну тIаьнну бикIай чIявусса инсантурая ттула ниттил ниттиясса хьин-хьинсса махьру баллай, вайннан га ттигу ххиранува бущиву чIалай. Инсантурая ганиясса хаварду чIявуну баллаврил, ттунмагу га кIулну бивкIусса кунмасса асар бикIай. Ххирар ванил балайрдах вичIи дишин, ванил суратру ххал дуллан.

Ларгсса шинал РЦОЗСиР центрданул (Республиканский центр охраны здоровья семьи и репродукции) пишкартурал дурну дур 1 453 ЭКО.

Зулайхат ТАХАКЪАЕВА

Центрданул пресс-службалий бувссса кушцуй, ларгсса шинал Дагъусттаннай оьрчI бакъ-

Ванил кумаграйхчил дунияллийн бувккун бур 209 вилттили оьрчI

ашиву хьин дан ва технологи-арттал кумаграйну оьрчI бан хIадур бувну бур 1 659 ласшар. 1 453 ЭКО-лува 900 дурну дур Республикалул ОЗСиР

центрданий. ЛирчIми тIурча, дурну дур федерал центрдай ва МахIачкъалалал, Москваулал ва цаймигу шагъурдал цивппа заллусса идарарттай.

Ларгсса шинал Дагъусттаннай, республикалул роддомирттал сияхIрайн бувну, ЭКО-лул кумаграйхчил дунияллийн бувкун бур 209 вилттили оьрчI.



Педагогнал даврил къимат



Тгалаткъини Расул Хамзатовлул цъанийсса Национал библиотекалулу ДР-лул Хикуматрал хъунаманал хъиривчу Муслим Телякавовлул каялувшиндаралу хъунни КИулшиву дулаврил ва элмулул министерствалул коллегия.

Зулайхат ТАХАКЪАЕВА

Микку ДР-лул виваллил иширттал министр Абдурашид Махаммадовлул бувсунни КИулшиву дулаврил идарарту террордания мюхчан баврил ххулий цукунсса чаранну ляхълай буссарив:

– Виваллил иширттал министерствалул зузалтрал цайми ведомствартташал цачуну дулай буссар КИулшиву дулаврил идарарту мюхчан баврил ххулийсса давуртту. Цусса шинал бухКуллий гъарцагу дуккаврил идаралий ци даражалий дуссарив ххал дайссар мунил террорданиясса мюхчаншиву. Ми ххал бигъавурттал Хисиллайн буну, цаък дайссар ялув бацавугу, – кунни министрнал.

КИулшиву дулаврил идарарту террордания мюхчан баврил ххулийсса чараннавух ванал КИИЦ лавгунни дуклаки оърчашал бакIра-бакIрах буллалисса профилактикалул ихтилатру, нитти-буттахащалсса багIавуртту.

Министрнал ТIутIимунийн буну, укунсса давурттаину бювхъуну бур чан дан дуклаки оърчал даянвсса ТIулдакъашивертту.

КИулшиву дулаврил министр ЯхIия Бучаевлул бувсунни Дагъусттаннал БакIчи Сергей Меликовлул Дагъусттаннай КИулшиву дулаврил шинну баян бувсса 2022-ку шинал даврил Хисиллая.

Ведомствалул дурну дур личИлициИсса журалул 120 мероприятияе.

«2022-ку шинал федерал органнал ва цайми регионнаясса КИулшиву дулавриву зузисса вакитталгу гурттуну дурссар республикалул КИулшиву дулаврил система хъхъичIуннай даврил масъаларттайн дагъайсса къура конференция ва ккуркки столлу, ххюра хъуннасса форум», – увкунни министрнал.

Республикалий КИулшиву дулаву хъхъичIуннай дансса ххулурдая буслай, ЯхIия Бучаевлул КИИЦ лавгунни гъануца тезисну хъанай бушиву республикалий цасса КИулшиву дулаврил пространство хIасул даву ва мукунна КИулшивулул даража лавай бансса ххулурду цинявппа оърчан ца-

куцну тIитIаву.

Му бакъассагу, ванал бувсунни 2023-ку шинал Дагъусттаннал халкъуннал шаэр Расул Хамзатов дунияллийн увккун 100 шинан хас дурну республикалий дан ккаккан дурну душиву тамансса мероприятияртту.

Хъирив КИулшиву дулаврил министрнал хъиривчу Аида Далгатовал бувсунни Педагогнал ва насихIатчинал шинан хас дурну 2023-ку шинал дан ккаккан дурсса давуртта.

«Педагогнал ва насихIатчинал шин хас дуллалиссар, так учительтуран дакъасса, оърчан ялун ххисса КИулшиву дуллалисса зу-



Миясат Муслимова Муслим Телякавовлул

залтран (миннавухва магъирлугърал идарарттангу) ва спортрал тренертуран. 2023-ку шинал лажиндарай хъуннасса лагрулий дуллантиссар республикалул ва федерал даражалийсса пишакаршиврул форумру, конференцияртту», – увкунни Далгатовал.

Сентябрь зуруй хъунтIий дур Педагогнал ва насихIатчинал шинан хас дурсса Хъуннасса педагогический диктант ва Щалагу Аьрасатнал дарс. Октябрь зуруй хъун тIий дур Хъуннасса учительтуран ножмар. Мукунна хъун тIий бур пишакаршиврул конкурсру «Учитель года», «Воспитатель года», «Педагогическая династия», «Лучший молодой ученый» ва цаймигу.

«2023-ку шинал федерал даражалий зузи бан тIий бур педагогтуран кабакъулунсса Щалагу Аьрасатнал лагрулийсса конкурсру. Масалдаран, «Учитель

2023-ку шинал федерал даражалий зузи бан тIий бур педагогтуран кабакъулунсса Щалагу Аьрасатнал лагрулийсса конкурсру. Масалдаран, «Учитель года России» Щалагу Аьрасатнал конкурсрай ххув хъусса учительнал дулун ккаккан дурну дур ца миллион къуруширттал, КИилчинмур ва шамилчинмур КИантту бувгъуминнан – ххютту-ххюттурушазарда къуруш. «Воспитатель года России», «Директор года России», «Педагог-психолог России», «Учитель-дефектолог России», «Мастер года», «Сердце отдаю детям» тIисса пишакаршиврул конкурсирттай ххув хъуминнан – КИитту-КИиттурушазарда къуруш.

Жижара

Ссавур Заннал дулуннав

Хъуннасса дард-хажалатгу кIидачIлай, дакIнийхтунусса жижара буллаи буру Украиннайсса хасъсса аьралий операциый жан дуллуца Мурад Магъдиевлул кулпатравминнахъ ва махъсса гъан-маччаминнахъ.

Магъдиев Мурад Халидлул арс увну ур июндадул 28-нийн 1994-ку шинал Ккуллал шяраву. Буттал шяраву 2-мур школагу къуртал буну, ванал ларсун дур ларайсса КИулшиву. Лавгун ур армиялийн, тиккура чирчуну дур аьралий контракт.

Ва ия мийжаннугусса аьраличу, дакIнийхтуну шаллу буллайгу ия цайва бивхъусса бурж. Мурад хъанайссар Аьрасатналгу, миллатралгу, шяраваллил жяматралгу пахруну, ялун нанисса никирансса эбратну. Ва ия ххаллилсса аргсу, усугу.

Махънахъхъун ва хъуннасса



къумашиву духIансса ссавур Заннал дулуннав. Мурадлул рухI рахIатний дишиннав.

Ккуллал райондалул администрациялул цъания Шамиль РАМАЗАНОВ

ИНА ЖУ КЪАБИВТУННУ

Къукуннал Сиянатлул аьпалун

КИулцириннал дяниву Цинявннан ххиранугу, Ина жу къабивтунну, Къадар Занналли куну.

Ина вила агълулийн Бивтнасса баргъну бивя, Гъарнах аякъалийсса Цимилул заллу бивя.

Цанъявав, цими бакъа, Ина жуца зеххайсса? Вил барачат къувкъуну Къабитайсса цанъявав?

Бакъанугу утти жух Ялугълай вил жавгъарду, Миннул чани абадий Жуву къалешантIиссар.

Салман Исмаилов, ш. Гъуйми

Итххавхсса оърчансса центрданий

Дагъусттаннал Хикуматрал председатель Абдулмуслим Абдулмуслимов ва ДР-лул Халкъуннал Мажлисрал председатель Заур Аскандаров бивунни Дагъусттаннал паччахIлугърал шяраваллил хозяйствалул университетрал базалий ЧIумуйну тIивтIусса «Альтаир» тIисса Итххавхсса оърчансса центрданийн.



Имара САИДОВА

Хикуматрал хъуниминнан центрданийхсса экскурсия бунни Центрданул директорнал бигарду биттур буллалисса Аймисай Дибировал.

Ванил бувсунни, ва Центргу Сочилийсса «Сириус» тIисса Аьрасатнаву яла хъуннамурну ккаллисса КИулшивуртту дулаврил центрдануха лархъхъуну тIиртIусса душиву.

Центрданул хъхъичI бивхъусса агъамсса мурадну хъанайссар итххавхсса оърчал гъунарду аьч баву ва миннал ЧIарав бацаву.

ХIакъинусса къини Центрда-

ний бур искусствалул, элмулул ва спортрал чулухунмай оърчIру итххавххан буллаи.

Ва къини Абдулмуслим Абдулмуслимовлул ххал бивгъунни телестудия, олимпиадарттайн оърчIру хIадур байсса химиялул, физикалул ва биологиялул дарсру дишайсса аудиторияртту.

Шиккува КИИЦ лаган, КИулшивуртту дулаврил центрдал объектру бантIиссар Дагъусттаннал БакIчинал резиденция дусса КИанттурдай.

2021-ку шинал ДР-лул БакIчинал Хикуму буну буссия «Альтаир» центрданунсса 14,4 г аьршарал итадакъинсса.

Лакрал халкъуннал учаларттава

Аьнхба бацан хъуу, хъац бацан марцагу бакъа.

Аьрава гъагъарчан – тлама, ниц бивчарчан – дикI.

Аьркун аьрча тIун лахъхьин мабулларда.

Аьр тIаннул мяр къабу-гъайссар.

Балаллуцалсса бакъухъни-яр щинахун ини хъинссар.

Барачатсса къаллуу кырихълу чан къащайссар.

Бахилнан дучIантIи кыни къакIулссар.

Баргъ бакъа гъи къарцин-ссар.

Буртти икIан чу бакъуй, чай дишин кIили дакъуй.

БурицIил хъу каччи залун-найнеу биллан бикIайссар.

БурицIил оьрчIангу ккашил-ли ав чин лахъхьин байсса.

Бутаннина ав шахълай ур.


Буттал ирс букансса арс-гу, ниттил буттукъа лиянсса душеу къахъуннав.

Бюруралукъавчума ккарч-чухссаннулгу уччин къаай-ссар.

БакIрал – амру, канил – даву.

ЧIунлахъиялун

КIяламиннул 2 ходрай мат дихълай бур.



1. ф2а2 КрI 2. фg2х
1. КрI 2. фg2х



«Илчи» – маслихатчи АхъницIунсса маслихатру



интту хъяхлахимунил лагма-ялтту, аьршарал ялтту кофе зур-зу дурну хъинссар.

Цанакул сийлий дур чагъар-дал филтър-пакетикиртташалсса кофе. Агана зуннагу ххирахъур-ча укунсса кофе, пакетикругума экъимабичари, вайгур оьргъа-шиврун бучIи хъунтIисса.

Кофелул къункъая нигъа бу-сайсса бур дургъумунил ялтту тихун-шихунмай занан ххирасса шярал ччитригума.

Чяйлул заварка

Чяйлул заварка, ишла дур-ну лирчIмур, къакъан дувару. Заварка ва кофелул дукъ лар-сса аьршаравух хIала дувар-ча, му кIукIлу хъуну, хъяхлахи-мунища цилва мархри бигъан-ну ва рахIатну тIитIин буван хъунтIиссар. Хъиннура хъин-ссар хъуни чIапIив бумур чяй-лул заварка.

Цанана байбивхъуну, салкьи дуресса чяйлул чяма инттухун-най аьркин хъунтIиссар (аьршаравух хIала дуван дакъагу) дургъумур хъяхлан диркIун махъгу ялтту дичин, аьршаравусса хъатру дугълансса къатну.

P.S. Оьргъашиврун ишла дуванмур салкьи дуллан къачар-ча (ягу дуллансса кIану бакъа-хъурча), бучIиссар вай (ккуну-крал, чимусул, нувшул, банандалул ккиртту, заварка, кофе, ахъуу ливчIсса чIапIив, чагъар, опилкартту, лах ва м.ц.), ахъуу ца хъунтIа дурккун, най дунура гивун дичлай, ца кIанай цацIун дувангу.

**ХIадур бувссар
Бадрижамал АБЛИЕВАЛ**


Муркъилийнияр ахъуу хъинмуния

Кинттул ахъуу, дачалий дулланмур къадикIай. Ванийн бувну кIи дур интту ишла дувансса оьргъашиврун аьркинмур салкьи дуллан яла хъинмур чIун. Оьргъашиврун ишла дуван бюхълай бур, жура дуркуну, дукралун ишла дурну лирчIмургума. Анавар мабуккару ккунукрал, нувшул, чимусул, банандалул макъартту-ккиртту, заваркалул чяма экъидичин. Вай цимурца жушара интту-хуннай ахъуу, дачалий мюнпатну аьркин дан хъунтIиссар. Шиву чIявуссар аьршаран ва ваний дугълагъимунин чара бакъа аьркин-сса витаминну ва цаймигу затру.

Кофелул дукъ

Шахъан дувайсса кофелул аьршаран кумаг бувайссар кукуну «сикI ласлан», хъатру бигъану къамул дуллан. Аьрши азо-трал дуччин дувайссар, аьршаран чара бакъа аьркинсса къю-нукъай шатри кIункIу бувайссар. Кофелуу буссар дургъумунин мюнпатсса магний ва калий.

Ва ялагу, кофелуя нигъа бу-сайсса бур ахънил зиянчиталгу, цаппарасса зиянчитал кофе са-вавну литIайссагума бур. Укун,



Оператив штабрал бусласимур

ХIакъинусса кыни (февраль-данул 2-ний) Дагъусттан-най коронавирусрал къашавайсса 102 827 инсан ур (гъантлун 17 инсан къашавай хъанай ур). Хъин хъуну ур 99 019 (гъантлун 22 инсан). ИвкIуну ур 3 629 инсан. Ххал увну ур (тестру дурну) 6 254 434 инсан (гъантлун 5190).

Дагъусттаннайсса вакцинациялул хIасиллу

Дагъусттаннай - 1 752 087


Ккуллал райондалий - 6 053

Лакрал райондалий - 6 194


ЦIуссалакрал райондалий - 22 611



МАХIАЧКЪАЛА



Гъавалул тагъар



гъумучи



Газета «Илчи» (Вестник)

Учредитель:
Агентство информации и печати
Республики Дагестан

Хъунама редакторнахлу:
БАШАЕВ Р.М.
Тел.. 65-00-07

Къардашов Р. Ав. Тел. 65-03-12
хъунама редакторнал хъиривма

Редколлегия:
Адамов АбдурахIман
МахIаммадович
Аьлиев ХIажи Сулайманович
Исрапилов Артур Анварович
КъурбанмахIаммадов Чанкура
Рамазанович
Маммаев Сулайман
Нураттинович
МахIаммадов Юсуп ХIамидович
Хаппалаев Аслан Юсупович
Хасаева Гульшан Рамазановна
ХIажимирзаев Зиябуттин
Абусупиянович
Шалласуев Шалласу Рамазанович
Эльдарова Роза ХIажиевна

Отделлал редактортал:
Абдуллаева А. П.
Аьдилов ХI. А.
Рамазанова П. ХI.
Тахакаева З. К.
ХIусайнаева К.А.

Подпискалул отдел:
Абдуллаев А. Къ.

Корреспондентъгал:
АьбдурахIманова З. Т.
Аьлиева Б. Д.
Саидова И. А.

Корректор:
АхIамдова А.И.

Кказитрал компьютерданул цех:
Абакарова К. Н.
ХIажиева З. У.

Кказитрай дурксса макъаларттаву кIицI лавгмур тIайлашиврул жаваб дулайссар чивчуманал. Редакция макъалалул залуннал пикирийли ризину бакъахъурчагу, макъала ришайссар, жяматрал цаламур пикири бусанссар тIисса ниятрай. Кказитрайн дуркIсса макъаларттайн рецензия къачай-чайссар ва ми залуннахъун зана къадайссар.

Кказит буккайссар нюжмардий цал. Шинай итабакъайссар 52 номер.

Кказитрал индекс. П7046
Тираж – 2000 экз.

Адрес редакции и издателя:
367018, г. Махачкала,
пр-т Насрутдинова, 1а
e-mail. ilchi@rambler.ru
http://ilchi.info
Тел./факс. 65-00-07

Газета «Илчи» зарегистрирована
Управлением Федеральной службы
по надзору в сфере связи, инфор-
мационных технологий и массовых
коммуникаций по РД.
Рег. ПИ № ТУ 05-00424
от 30.04.2019

Газета «Илчи» отпечатана
в типографии ООО «Издательство
«Лотос».
367018, РД г. Махачкала,
Пр-т Насрутдинова, 1а
Срок подписания в печать 19.00.
Подписано 19.00.
Цена свободная



4 651116 280051